

# KINSA KINING SI MELQUISEDEC?



Atong iduko ang atong mga ulo alang sa pag-ampo.

Minahal nga Langitnong Amahan, among nadungog kining awit nga *Only Believe*, kini nagpahimatngon kanamo nga kana mao lamang ang among gikinahanglan pagabuhaton aron sa pagpanunod sa bisan unsang mga saad sa Dios, toohan lamang sila. Kay kini nahisulat na, “Ang tanang mga butang mahimo alang kanila nga nagatoo.” Ingon nga kami nagatuaw, sama sa usa ka tawo nga adunay anak nga patolon, “Ginoo, ako nagatoo! Tabangi ang akong dili pagka-matinoohon.”

<sup>2</sup> Kami nagapasalamat Kanimo tungod sa Imong dakong gahum, ang Imong dakong pagpadayag sa Imong Kaugalingon alang kanamo niining katapusang mga adlaw. Nagahimo Kini sa among kasing-kasing nga pinakamalipayon ug masadyaon, sa pagkasayod nga kami nakadangat sa pag-pakigsandurot uban sa buhing Dios; Kinsa nagapamatuud niini balik diha sa pisikal, materyal nga mga kalig-onan, sama sa Iyang gibuhat sa mga nangaging mga adlaw, ug maingon nga Iyang gisaad alang niining adlaw. Kami mapasalamaton kaayo Kanimo, among Dios. Niining mangiob nga adlaw diin daw wala nay usa nga nasayod kong asa ang dalan nga kapaingnan, kami malipayon kaayo nga among nakaplagaan ang dapit sa kasigurohan, ang dalangpanan.

<sup>3</sup> Karon panalangini kami niining gabhiona, Ginoo, samtang among hisgutan ang Imong Pulong. Ug ang mga saad nga nahatag na kanamo, hinaot nga among mamatuto sila sa among mga kasingkasing, panggaon sila uban sa pagtahod, ug tumanon sila sa matuod nga diosnong pagpanton. Kay among gipangayo kini sa Ngalan ni Jesus. Amen.

<sup>4</sup> [Dunay usa ka tawong nakigsulti kang Igsoong Branham—Ed.] Usa ka halad sa gugma? Dili sila angay. Dili nila angay gibuhat kana. Kinsay nagbuhat niana? Sad-an ka? Gibadlong ko ang tagdumala. Matud niya nga nagpapasa siya’g halad sa gugma alang kanako. Dili niya unta angay gibuhat kana. Akong ginapasalamaton kini, ang Dios nasayod niana, apan ako-ako wala gayud mianhi alang niana. Salamat kaninyo. Hinaot nga ang Ginoo magapanalangin kaninyo. Buhaton ko ang tanang butang nga akong mahimo. Ako ibutang kini dayon diha sa mga bulohaton sa ubang nasud, sa ingon akong masayran nga moadto kini alang sa Gingharian sa Dios. Ug kong itugot sa Ginoo, dalhon ko kini, ako mismo, ngadto sa mga kanasuran,

aron dalhon kining mao gihapong Maayong Balita nga inyo nang napahilunaan, gipaminawan ning semanahona, dayon niini akong masayran nga kini buhaton sa paagi nga inyong gitooan Kini. Ang Ginoo magtabang kanako sa pagbuhat niini.

<sup>5</sup> Ako mapasalamaton kaayo sa daghang nanambong niining semanahona, ug kaninyong tanan nga naminaw pag-usab niining gabhiona pinaagi sa—sa mga linya sa telepono. Ug kami mapasalamaton sa matag usa kaninyo.

<sup>6</sup> Si Billy miingon kanako ganihang buntag, matud niya, “Daddy, kong mikuyog ka lang kanako ganihang buntag, sayo, sa pagsubang gayud sa adlaw, ug motindog dinhi sa gawas sa palibot niining mga dapit ug motan-aw sa mga inahan nga nagapakaon sa ilang mga bata diha sa sakyanan, silang mga tawong kabus nga nagpasi-ulan, nanagpaabot nga ablihan ang mga pultahan!” Inyong makita kong unsa ako ka mahimong hipukrito kong suginlan ko kamo’g bisan unsang butang gawas sa Kamatuoran? Mahimo gayud ako usa ka tawong mangil-ad. Usahay ako kinahanglan mopasakit, apan dili tungod kay maoy akong gusto, kini tungod kay. . . Ako dili maoy nagpasakit. Ang Kamatuoran maoy nagpasakit. Ug ako—ako. . . Apan ako nagatoo nga kana maoy hinungdan nga kamo mianhi, tungod kay ako nagmatinud-anon gayud kaninyo, ug buhaton ang tanan nga kutob sa akong mahimo aron pagtabang kaninyo. Ang Ginoo magatabang sa matag usa kaninyo.

<sup>7</sup> Ug karon akong buut pasalamatan ang katawhan alang sa ilang maayong pagtinabangay, ang katawhan sa dakbayan dinhi, usab, kinsa mihatag kanato, mitugot kanato sa pag-abang niining tulunghaan, kining awditoryum ug ang himnasyo. Ug buut kong magpasalamat sa mga opisyaes kung ania kamo dinhi. Ug usab buut kong magpasalamat kay Thurston Colvin, nga maoy magbalantay dinhi, alang sa iyang maayong pagtambayayong sa pagtabang kanato aron pagkuha niini ug sa iyang pagpakig-uban kanato sa matag gabii.

<sup>8</sup> Kita nagapasalamat sa puwersa sa kapulisan sa Jeffersonville sa pag-anhi dinhi ug sa pagbantay, uban sa labing kubos nga bayad. Sa akong banabana mga duha ka dolyar ang matag oras, nga ang pulisya gipahimutang dinhi alang sa pinasahing katungdanan, sa pagpahimutang sa mga sakyanan, aron pagtan-aw nga wala. . . walay panghitabo, ug ang tanan mahapsay. Kami mapasalamaton sa mga katawhan tungod niana. Ug ngadto sa—sa, usab, sa inhenyero dinhi sa—sa konseho, namatikdan ko siya. Ug sa tanan nga may kalabotan niini, kami sa tinud-anay mapasalamaton diha kaninyo.

<sup>9</sup> Ako nagapasalamat sa matag usa kaninyo alang sa mga gasa. Si Billy bag-o lang nagdala kanako, ganihang hapon, usa—usa ka gasa, pipila kanila, ug mga kinton, dulce, ug uban pa. Ug usa kanila mao ang—ang Beatitudes, uban sa hulagway ni

Cristo nga ania niini—niini, ang Sermon on the Mount. Ug sa matuod kini matahum. Ako sa matuod nagapasalamat kaninyo. Ug sa daghan pa kaayong butang, ako dili na makahibalo kong unsaon ang pagpasalamat kaninyo. Dayon, usab, sa inyong—inyong pagpaluyo, salapianong pagtabang sa tigum, sa tinud-anay kami gayod nagapasalamat niini, sa tibuuk namong kasingkasing. Ang Ginoo magapanalangin sa matag usa kaninyo, sa madagayaon.

<sup>10</sup> Matud ni Billy, dunay daghang katawhan, ikaw nangutana alang sa mga pribadong pakighinabi niadtong panahona. Ug daghan ang mihangyo ug adunay gagmay'ng mga bata nga igahalad. Oh, daw sa unsa ko ka gusto buhaton kana!

Apan, inyong nakita, sa akong pag-abot ning panahona, kini dinalian kaayo. Ako kinahanglan magpabilin mismo, sa tanang panahon, sa pagtoon, niining Pulong ug sa pag-ampo, alang sa pagdala niining mga Mensahe. Kita n'yo, sila dili . . . Sila—sila talagsaon alang kanato, tungod kay kini mao ang paghibalo sa kabubut-on sa Dios ug dayon ang pagsulti sa mga butang. Ug ang tanan nga gikinahanglan magkatagbo, ug sa paghangyo sa Dios kong hain gayud niini ang pagaablihan.

<sup>11</sup> Karon, kon itugot sa Ginoo, kami mobalik pag-usab sa dili madugay, sa diha-diha kong makahigayon kami'g panahon. Ako nakahimo'g usa—usa ka sugyot, o—o naghigot sa butang bahin sa Pasko sa Pagkabanhaw. Mas maayo nga akong susihon kana, tungod kay morag aduna ko'y talamdan sa California dungan nianang panahona. Busa masayup tingali kana. Bisan pa niana, sa dihang makabalik na kami pag-usab sa tabernaculo, kami magapadala kaninyo sa kard, ug sa iglesia, ug—ug ihatag kaninyo ang—ang pitsa ug oras. Dayon akong himoon, tingali nianang panahona, usab . . .

<sup>12</sup> Wala ko pa nagahinan og panahon ang pagpang-ampo sa masakiton. Kita wala pay usa ka bulohaton nga atong nadala ang katawhan ug nag-ampo alang kanila. Ato silang sukad ginapadala. Ug ang atong mga kaigsoonan dinhi nagawali na sukad pa, si Igsoong Lee Vayle ug Igsoong . . . Kining ubang mga igsoong lalaki nagwali na sukad pa, ug nagapang-ampo alang sa masakiton, ug nagahimo sa pagpangbautismo sa tubig, nagapangbautismo, diay, ug nagatugot kanako sa pagpabilin nga mag-inusara kauban sa Pulong. Kita nagapasalamat niining mga kalalakin-an. Ilang nahimo ang talamdanong buhat.

<sup>13</sup> Aniyay daghang kahigalaan dinhi nga buut kong mahimamat. Ako mitan-aw sa ubos ug nakita si John ug si Earl. Ug anaa si Doctor Lee Vayle, usa sa mga tigdumala sa kampanya. Si Igsoong Roy Borders. Silang kalalakin-an, ako wala gani pa . . . ako wala pa gani nakapanglamano sa ilang mga kamot. Ako wala pa nakahigayon niana. Akong gihunahuna ang akong mga higala gikan sa Kentucky, ug sa palibot dinhi, ug mga higalang

ministro, daw sa unsa ko ka gustong makalamano ang ilang mga kamot! Si Igsoong Blair, akong namatikdan siya dinhi sa miaging adlaw. Ug daghan sa niadtong kalalakin-an nga akong—akong gihigugma, ug sila nakatambong na sa pipila ka mga panagtigum, ug wala pa gani ako gayud makalamano sa ilang kamot. Ako—ako nagapaninguha. . . Dili tungod kay dili ko buut nga buhaton kana; kini tungod kay walay akong panahon sa pagbuhat niini, ug ako usa nga nagadali lamang.

<sup>14</sup> Pagpanghalad sa mga bata, mahimo. Ang akong kaugalingong anak, ang akong gamay'ng apo unta ihalad niining tiguma. Ako wala nay panahon sa pagbuhat niini; si gamay'ng David. Apohan na ako, sa duha na ka higayon karon. Busa, si Mister May, kong siya ania niining gabhiona, nga maoy naghatag kanako nianang sungkod, mora og magamit ko kini sa dili na madugay.

<sup>15</sup> Busa, ug akong giingnan si Billy, matud ko, “Ang Biblia lagi nag-ingon sumanay ug pun-on ang yuta,’ apan ang tanang lulan wala ihatag kanimo.” Ug kining mga apo daling nanungha.

Ug busa, hinumdumi, ang akong umagad usa ka apuli, sa sugod pa lang. Siya dili makahimo sa pagpanganak. Ug usa niana ka adlaw, talilakaw sa usa ka tigum, ang Ginoo misulti kanako ug nagkanayon, “Loyce, ikaw magsamkon sa usa ka batang lalaki. Ang Ginoo nagpanalangin kanimo. Nawala na ang imong depekto sa pagkababaye.” Natawo si gamay'ng Paul, paglabay sa siyam ka bulan.

<sup>16</sup> Duha ka bulan sa wala pa kining maong bata motungha, ako nagalingkod, nagapamahaw usa niana ka buntag, diha sa lamisa, ug si Loyce ug Billy nagalingkod sa atubangan ko sa lamesa. Ug akong nakita si Loyce nga nagapatotoy sa usa ka gamay'ng bata uban sa usa ka kolor rosas. . . o usa ka asul nga habol nga nagputos niini. Ug si Billy nagalingkod diha sa daplin, nagapakaon kang gamay'ng Paul. Matud ko, “Billy, ako bag'ohay lang nakakita'g panan-awon. Si Loyce nagapatotoy sa usa ka bata nga giputos sa asul nga habol.”

Matud niya, “Dili na madayon ang akong pagpangayam. Kana siyam na lang ka bulan gikan karon.”

Milabay ang napulo'g usa ka bulan, ang gamay'ng David natawo. Ug akong dili pa nahimo ang paghalad kaniya sa Ginoo, ug dili mahimo hangtud sa among paghibalik pag-usab. Busa nakita ninyo kong unsa kini.

<sup>17</sup> Daw sa unsa ko gihigugma ang katawhan ug sa ilang pakig-ambitay! Apan ang atong mga kaigsoonan nagsige nang nagpang-ampo sa masakiton, ug ako nasayod nga kini malampuson. Sa matag gabii kami nag-ampo sa masakiton, ang usa nagapandong sa ilang kamot sa usa'g usa, tanan kanamo nagdungan, nga sa nianang paagi kini nahisakop ang tanan. Apan tingali, kon itugot sa Dios. . . Akong isulat kini diha sa

kard, kong among ipadala kini. Sa pagbalik, akong buut igahin ang duha o tulo ka adlaw, pag-usab, alang lamang sa pagpang-ampo sa masakiton ug sa pagbuhat kong unsay among mahimo sa nianang mga pamaagi. Karon, ug ako nagapasalamat sa katawhan alang sa ilang tabang, pag-usab.

<sup>18</sup> Karon buut ko lamang mamahayag, sa makadiyut lang, sa—sa Mensahe ganihang buntag. Walay pagduhaduha, akong dili nahuman kini sa hingpit, apan ako nagahunahuna nga nakasabot kamo. Ug ako nakasiguro nga kamo wala... Inyo gayud dili masayran kon unsa akong kinahanglan agihan aron mabuhat ko kado.

<sup>19</sup> Karon, kini mora'g yano kaninyo kaayo. Apan, inyo, inyo bang nakita kong unsay imong ginabuhat? Imong ginakuha ang dapit sa Dios, aron ipamulong ang Usa ka Butang. Ug sa dili ko pa buhaton kana, kinahanglan moabot ang tubag gikan sa Dios. Ug Siya kinahanglan mokanaug, ug Siya sa dayag nagpakita sa Iyang Kaugalingon, ug gihatag ang Pinadayag. Busa, kita n'yo, kini alang ngadto sa Iglesia. Ug hinumdumi, matud ko, "Kining mga, kini kon unsa ang akong giingon, mao ngadto sa Iglesia lamang."

<sup>20</sup> Ug aron nga kamo maadunay pagsalig ug mahibalo, nga kato mao sa gihapon ang Dios nga miingon kanako didto sa diin nga walay eskwirel. "Ipamulong, ug isulti kon asa sila maanaa." Ug tulo ka sunod-sunod nga higayon kini nahitabo. Karon, kong Siya makahimo pinaagi nianang mao ra nga Pulong makamugna sa usa ka butang nga wala diha, unsa pa kaha nga Kini molungtad sa Adlaw sa Paghukom! Kita n'yo? May mga tawo nga atua didto aron pagsaksi niining mga butang, ug masayod. Sama sa giingon ni Pablo, sa milabay'ng mga panahon. Adunay kalalakihan uban kaniya, kinsa—kinsa mibati nga nauyog ang yuta; ug wala nakadungog sa tingog, apan ilang—ilang nakita ang—ang Haligi nga Kalayo.

<sup>21</sup> Nagbuhat kini'g kaayohan kanako, bisan kon, sa nahuman na kini; sa pagtan-aw sa mga bana ug mga asawa, nga akong nahibaloan nga tinuud nga mga Cristohanon, nanggakos sa usa'g usa ug nanghilak.

<sup>22</sup> Ug paminaw, mga higala, ang Dios nagapamatuod sa Iyang Pulong uban sa mga ilhanan ug mga pagpaluyo, aron pamatud-an nga Kini husto, ang gilitok nga Pulong. Karon hinumdumi, kadtong Kahayag nga didto sa Panganod, nga naghatag sa Pinadayag. Ako...

Ang akong gamay'ng batang babaye nagasulti kanako, ania si Sara, nga sa dihang sila... Kanang tulunghaan didto sa Arizona nagalantaw sa itaas didto sa walay panganod nga kawanangan, ug ginatan-aw kining Panganod nga katingalahang anaa nianang bukira, nagapata-as ug nagapaubos, uban sa nagasiga nga Kalayo nga nagdilaab Niini.

Ang magtutudlo gipaundang ang mga klase ug ang pagtudlo, ug gidala sila sa atubangan, ug miingon, “Nakakita na ba kamo’g butang nga sama niana? Tan-awa ang hulagway nga tua didto.”

Hinumdumi, nga mao ra sa gihapon kadtong nagasigang Kahayag nga diha sa bato. Busa mao ra kini nga Dios, mao ra nga Pinadayag, miingon, “Sultihi sila sa pagbuhat *niini*.” Mao kon unsa ang akong giingon kaninyo kaganinang buntag, busa anaa Kini.

<sup>23</sup> Kong kini nagakahinabo man nga ang maayo kong higala, si Igsoong Roy Roberson, nagapaminaw diha sa Tucson. Roy, nahinumduman mo, sa miaging adlaw, ang panan-awon nga imong nakita samtang kita atua didto sa gawas nga nagatindog ibabaw sa bukid? Ikaw miduol kanako, ug katong maong Panganod atua sa ibabaw? Nagalakaw ka panaug, ikaw nasayod kung unsay Iyang giingon kanimo; ug akong gisulti kanimo niadtong balaya, sa miaging adlaw? Mao na kato, Roy. Ayaw na’g kaguol, anak. Kini human na.

<sup>24</sup> Ikaw wala lang masayod kon unsay ginapasabot niana! Kini grasya. Siya nagahigugma kanimo. Ug ikaw nagahigugma Kaniya, mapainubsanong alagaran mo Siya ug simbaha Siya sa nahibilin mong mga adlaw. Pagmalipayon, padayon ug pagkinabuhi ingon nga ikaw. Kong malipayon ka, padayon nianang paagiha. Ayaw na pagbuhat pa ug bisan unsang dili maayo pag-usab, sama niana. Padayon lamang. Kini mao ang grasya sa Dios.

<sup>25</sup> Karon buut kong mag-ampo pag-usab sa dili pa kita mosulod diha sa Pulong. Pila man ang mag-ampo alang kanako? Ako nagaadto gikan sa usa ka tigum ngadto sa laing tigum. Mag-ampo ba kamo?

Nahibalo kamo, buut kong awitan kamo sa usa ka hamubong awit, dunganan tang tanan, sa dili pa kita moadto sa Pulong. Alang lang. . . aron masayod ta sa Dios. . . Usa lamang ka gamay nga paghalad. Nakadungog na ba kamo niining mubong awit, *He Careth For You?* “Taliwala sa kahayag ug kagul-anan, Siya nahingawa nimo.”

<sup>26</sup> Ang batan-ong dalaga miduol na ngadto sa piyano. Ingon, buut ko magpasalamat niining batan-ong dalaga, usab. Wala gani ako makaila kon kinsa siya. Kini usa sa mga anak nga babaye sa diyakono dinhi. Akong nasiguro. . . Anak nga batan-ong babaye ni Igsoong Wheeler. Siya midaku na karon. Siya kaniadto gamay pa nga nagsabak sa akong tuhod, dili pa lang dugay, ug karon siya usa na ka batan-ong dalaga. Busa ako nagapasalamat gayud kaniya nga iyang gigamit ang iyang hiyas sa musika, ug karon siya nagatugtog nga maanindot kaayo. Mahimo ba nimong hatagan kami sa tunada, igsoon? Kitang tanan managdungan karon.

He careth for you,  
 He careth for you;  
 Through sunshine or shadow,  
 He careth for you.

Nakagusto ba kamo niana? Atong awiton kini pag-usab, kitang tanan.

He careth for you,  
 He careth for you;  
 Through sunshine or shadow,  
 He careth for you.

Igsoong Dauch, ginabuhat Niya kana kanimo, usab, igsoon. Gihigugma ba ninyo Siya? [Ang kongregasyon nagaingon, "Amen."—Ed.]

Atong iduko ang atong mga ulo karon.

<sup>27</sup> Minahal nga Maloloy-ong Dios, uban niining diyutay'ng sinulat dinhi sa pipila ka mga butang nga igasulti ngadto sa katawhan, ug balik pag-usab aron hisgotan balik ang sa ganihang buntag, tungod kay mao kana kon unsa ang gianhi sa mga tawo nga paminawon. Ako nagaampo, Dios, nga Imong itugot sa mga tawo nga makita nga ang Dios nagahigugma ug nagakahingawa. Ug dili ako ang mao nga naghatag Niana, Ginoo, kini gipamatud-an nga kadto maoy Kamatuoran. Busa ako nagaampo, Minahal nga Dios, nga ang Imong gugma kanunay'ng magpabilin diha sa katawhan. Karong gabhiona, sa panagbulagbulag tapus niining tigum ug mopauli ngadto sa among nagkalainlaing mga puloy-anan, kini—kini daw nagahugot kanamo, sa pipila, sa halawum, Ginoo. Ako nagaampo nga Imong panalanginan kining katawhan.

<sup>28</sup> Karon sa dihang kami nagaduol sa Pulong, diha sa pag-ampo, ug ginaduol ang sinulat nga Pulong, among ginapangayo nga Imong kuhaon kining sinulat nga Pulong ug himoong buhi Kini kanamo karong gabhiona. Ug sa dihang mobiya na kami niining tigumanan karong gabii aron magbulagbulag sa pagpanguli sa among nagkalainlaing poluy-anan, hinaot nga kami makaingon sama niadtong nagagikan sa Emmaus, nga nakiglakaw uban Kaniya sa tibuuk adlaw nga sa gihapon wala makaila Kaniya; apan sa diha Iya nang gidala sila sa sulud sa lawak niadtong gabhiona, ug ang tanan pultahan gisirad-an, Iyang gibuhat ang usa ka butang nga sama sa Iyang gihimo sa wala pa ang Iyang pagkalansang. Pinaagi niana, ilang nasayran nga Siya nabanhaw pag-usab.

Buhata kini pag-usab karong gabii, Ginoo. Itugot kini, samtang ang mga pultahan sirado, ug ang Imong gamay'ng panon dinhi nagalingkod, nagapaabot. Ug, Amahan, sa dihang kami mopauli na sa among mga balay, among ikaingon ang sama sa ilang giingon, "Dili ba ang atong mga kasingkasing nagdilaab man sa sulod nato samtang nagsulti Siya kanato diha sa dalan!"

Among ginatugyan ang among kaugalingon, ug ang tanan na, sa Imong mga kamot, Ginoo. Buhata kanamo sumala sa Imong makita nga angay. Sa Ngalan ni Jesus. Amen.

<sup>29</sup> Karon moadto na kita mismo sa bulohaton karon, sa labing dali. Sa pag-abli karon uban kanako, kong buut ninyo, diha sa Basahon sa Mga Hebreohanon, ug usa pa ka pinadayag diha sa Mensahe. Kita magahisgot sa hamubo lamang nga panahon niining gabhiona, kon itugot sa Ginoo. Ug dayon samtang ginabasa ang unang tulo ka mga bersiculo sa Mga Hebreohanon 7:1 ngadto 3, ug dayon mamahayag diha niini. Ug kita wala masayod kon unsay pagabuhaton sa Ginoo; kita wala mahibalo. Ang bugtong butang nga atong buhaton mao ang pagtoo lamang, magbantay, mag-ampo. Husto kana? Ug toohan nga “Iyang pagabuhaton ang tanang butang nga managkaduyog sa pagpamuhat alang sa kaayohan uban kanila nga nagahigugma Kaniya,” tungod kay Iyang gisaad nga buhaton.

*Kay kini si Melquisedec, nga hari sa Salem, sacerdote sa labing halangdong Dios, misugat kang Abraham sa nagpauli kini gikan sa pagpamatay sa mga hari, ug nanalangin kaniya;*

*Ug alang kaniya gigahin ni Abraham ang ikapulo sa tanang butang; una sa tanan sumala sa hubad sa iyang ngalan siya Hari sa katarungan, ug unya Hari usab siya sa Salem, nga sa ato pa, Hari sa kadaitan;*

Atong padayonon sa pagbasa og diyotay sa unahan.

*Siya walay amahan, ni inahan, ni kagikanan, . . . wala usab siya’y sinugdanan sa mga adlaw, ni katapusang sa kinabuhi; hinonoa ingon nga nahisama sa Anak sa Dios; magapadayon siya nga sacerdote hangtud sa kahangturan.*

<sup>30</sup> Pamalandunga kining gamhanang Tawo, kong unsa gayud kagamhanan kining Tawhana! Ug karon, ang pangutana mao, “Kinsa man kining Tawhana?” Ang mga teyologo adunay nagkalahi-lahing pangagpas. Apan sukad sa pagkaabli sa Pito ka mga Timri, ang Basahong tulukibon nga kanhi tinagoan alang kanato. . . Sumala sa Pinadayag 10:1 ngadto 7, ang tanang mga tinago nga nahisulat dinhi niining Basahon, nga gililong tadlas sa panahon sa mga repormador, maoy gitoohang igapadayag na diha sa tin-aw pinaagi sa manulonda sa katapusang panahon sa iglesia. Pila man ang nasayod nga husto kana? [Ang kongregasyon nagaingon, “Amen.”—Ed.] Husto kana, gitoohan nga igapadayag. Tanan nga mga tinago sa Basahong tulukibon maoy igapadayag ngadto sa mensahero sa Laodicea niana nga panahon.

<sup>31</sup> Sa nakita nga adunay dakong lantugi bahin niining Tawhana ug niining hisgutanan, nagtoo ako nga mahinungdanon kini kanato ang pagsaysay niini, aron hibaloan kong Kinsa kini



Siya. Karon, adunay pipila ka mga panghunahuna mahitungod Kaniya.

Usa sa ilang panghunahuna mao, nagapangangkon nga, “Siya usa lamang ka sulugilanon. Siya dili gayud usa ka tawo.”

Ug ang uban nagaingon, nga, “Usa kadto ka pagka-sacerdote. Kadto mao ang pagka-sacerdote ni Melquisedec.” Kana maoy usa sa labing haduol, nga bobintaha kay sa nianang ilang gitooan sa lain, tungod kay sila nagaingon kini kadto usa ka pagka-sacerdote.

Kini dili maingon niana, kay diha sa ika-4 nga bersiculo Kini nagaingon nga Siya usa ka Persona, usa ka “Lalaki.” Busa, aron nga mahimong usa ka Persona, Siya kinahanglan nga mahimong usa ka personalidad, usa ka “Lalaki.” Dili usa ka laray; kondili usa ka Persona! Busa dili lamang Siya usa ka laray sa pagka-sacerdote, ni usa Siya ka sulugilanon. Siya usa ka Persona.

<sup>32</sup> Ug ang maong Persona Walay Katapusan. Kong inyong namatikdan, “Siya walay amahan. Siya walay inahan. Walay Iyang panahon nga Iyang sinugdan. Ug walay Iyang panahon nga Siya natapus.” Ug kong Kinsa man siya kadto sa gihapon buhi niining gabhiona, tungod kay ang Biblia nag-ingon dinhi, nga, “Siya walay amahan, ni inahan, sinugdanan sa mga adlaw, o katapusan sa kinabuhi.” Busa Kini kinahanglan Persona nga Walay Katapusan. Husto ba kana? [Ang kongregasyon nagaingon, “Amen.”—Ed.] Usa ka Walay Katapusang Persona! Busa kini mahimo nga usa lamang ka Persona, kana mao ang Dios, kay Siya lamang ang Usa nga Walay Katapusan. Ang Dios!

<sup>33</sup> Karon, diha sa Unang Timoteo 6:15 ug 16, kong buot ninyong basahon kana sa umalabot, gusto ko nga basahon ninyo kini.

Karon, ang butang nga akong gipanalipdan mao, nga, Siya mao ang Dios, tungod kay Siya mao ang bugtong Persona nga mahimong dili mamatay. Ug karon, ang Dios nagausab sa Iyang Kaugalingon ngadto sa pagka Persona; kana mao kon unsa Siya kaniadto, “Walay amahan, walay inahan, walay sinugdan sa kinabuhi, walay katapusan sa mga adlaw.”

<sup>34</sup> Karon atong makita diha sa Kasulatan nga daghang mga tawo ang nagatudlo nga, “tulo ka personalidad diha sa Pagkadios.” Sa ingon, dili ka magkaadunay personalidad gawas sa pagka usa ka persona. Kini nagkinahanglan sa usa ka persona aron mahimong usa ka personalidad.

Usa ka ministro sa Baptist, sa pipila na ka mga semana nga milabay, mihapit, ug sa akong balay, ug miingon, “Gusto kong tul-iron ka diha sa Pagkadios kong aduna ka nay panahon.” Nagtawag kanako, diay.

<sup>35</sup> Matud ko, “anaay akong panahon karon dayon, tungod kay buot kong mamatul-id, ug atong ipadaplin ang matag butang, aron buhaton kini.”

Ug siya mianhi, matud niya, “Igsoong Branham, ikaw nagatudlo nga adunay usa lamang ka Dios.”

Matud ko, “Oo, sir.”

Matud niya, “Bueno,” matud niya, “Ako nagtoo nga adunay usa ka Dios, apan usa ka Dios sa tulo ka mga Persona.”

Matud ko, “Mga sir, sublia pag-usab kana.”

Matud niya, “Usa ka Dios, sa tulo ka mga Persona.”

<sup>36</sup> Matud ko, “Diin ka man nagtungha nga tulonghaan?” Kita n’yo? Ug giingnan niya ako usa—usa ka kolihyo sa Biblia. Matud ko, “Makatoo ako niana. Dili ka mamahimong usa ka persona kondili una mahimong personalidad. Ug kong ikaw usa ka personalidad, ikaw usa ka personalidad sa imong kaugalingon. Ikaw usa ka lain, tinagsa nga binuhat.”

Ug matud niya, “Bueno, ang mga teyologo dili gani makapasabot niana.”

Matud ko, “Pinaagi kini’g pinadayag.”

Ug matud niya, “Dili ako makadawat ug pinadayag.”

<sup>37</sup> Matud ko, “Nan wala nay paagi ang Dios bisan unsa nga makaduol pa kanimo, tungod kay, ‘Kini gililong gikan sa mga mata sa makinaadmanon ug masinabuton, ug gipadayag ngadto sa mga gagmay’ng bata,’ gipadayag, pinadayag, ‘gipadayag ngadto sa mga gagmay’ng bata sa modawat niini, sa magtoon.’” Ug matud ko, “Wala nay paagi pa alang sa Dios ang pagduol kanimo; imong gisirad-an ang imong kaugalingon gikan Kaniya.”

Ang tibuuk Biblia maoy pinadayag sa Dios. Ang tibuuk Iglesia natukod sa ibabaw sa pinadayag sa Dios. Walay laing paagi sa pagkasayod sa Dios, pinaagi lamang sa pinadayag. “Kang kinsa ang Anak igapadayag Siya.” Pinadayag; ang tanan maoy pinadayag. Busa, ang pagda- . . . Ang dili pagdawat sa pinadayag, nan ikaw usa lamang ka bugnaw nga teyologo, ug wala nay paglaum alang kanimo.

<sup>38</sup> Karon, karon, atong nasayran nga kining Tawhana “walay amahan, walay inahan, walay sinugdanan sa mga adlaw o katapusan sa kinabuhi.” Kadto mao ang Dios, *en morphe*.

Karon, ang kalibutan, ang pulong nagagikan, ang Griegong pulong, nagkahulogan, “pag-ilis,” maoy gigamit. Naga-ilis sa Iyang Kaugalingon, *en morphe*, gikan sa usa ka Persona ngadto sa . . . Usa ka persona; ang Griegong pulong diha, *en morphe*, nagkahulogan. . . Kini gikuha gikan sa hugna sa tulumanon, nga ang usa ka tawo naga-ilis sa iyang maskara, aron pagpahimo kaniya’g laing bahin.

<sup>39</sup> Sama sa—sa tulunghaan, dili pa lang dugay, nagtoo ako, si Rebekah, sa diha nga hapit na siya mograduwar, adunay ilang usa ka dula ni Shakespeare. Ug ang usa ka batan-ong lalaki

kinahanglan mag-ilis sa iyang bisti sa pipila ka higayon, tungod kay midula siya kaduha o katulo sa managkalahing bahin; apan, mao rang tawhana. Siya mogula, sa usa ka higayon, siya ang tawong dautan; ug sa dihang siya mogula sa sunod nga higayon, lain na sab iyang papel. Ug karon ang Griegong pulong, *en morphe*, nagkahulogan nga siya “nag-ilis sa iyang maskara.”

<sup>40</sup> Ug mao kana kon unsay gibuhath sa Dios. Mao ra kini nga Dios sa tanang panahon. Ang Dios diha sa porma sa Amahan, ang—ang Espiritu, ang Haligi nga Kalayo. Ang mao ra nga Dios nadayag sa unod ug mipuyo uban kanato, *en morphe*, migula aron Siya makita. Ug karon kanang mao ra nga Dios mao ang Espiritu Santo. Amahan, Anak, Espiritu . . . dili tulo ka Dios; tulo ka mga buhatan, tulo ka mga kalihokan sa usa ka Dios.

<sup>41</sup> Ang Biblia nag-ingon, “Adunay usa ka Dios,” dili tulo. Apan mao kana nga sila dili . . . Dili mo na kini mahimong matul-id ug magkaadunay tulo ka mga Dios. Dili ka gayud makahaylo sa usa ka Judio niana. Sultian ko kamo niana. Usa nga labi pang nasayod, nasayod siya nga adunay usa lamang ka Dios.

<sup>42</sup> Timan-i, sama sa kinulit, siya nakatago, nga may—usa ka tabon nakatabon niini. Mao kana kon unsa ang gibuhath sa Dios sa niining panahona. Kini sukad gililong. Kining tanan nga mga butang gililong, ug gitoohan nga igapadayag dinhi niining panahona. Karon, ang Biblia nagaingon sila igapadayag sa kaulahiing mga panahon. Kini susama sa usa ka magkukulit nga nagahuput sa iyang—iyang kinulit nga tinabonang tibuuk hangtud sa panahon nga iyang kuhaon ang tabon niini ug diha kini anaa na.

Ug ingon niana ang Biblia sukad pa. Kini sukad pa usa ka binuhath sa Dios nga sukad pa gitabonan. Ug Kini gitabonan na sukad pa sa pagkatukod sa kalibutan, ug ang pito ka pilo nga tinago Niini. Ug ang Dios nagsaad niining adlaw, sa panahon sa niining iglesia sa Laodicea, Iyang kuhaon ang tabon sa kinatibuk-ang butang ug ato nang mahimong makita Kini. Unsa ka mahimayaong butang!

<sup>43</sup> Ang Dios, *en morphe*, nagmaskara diha sa Haligi nga Kalayo. Ang Dios, *en morphe*, sa usa ka Tawo nga gitawag og Jesus. Ang Dios, *en morphe*, diha sa Iyang Iglesia. Ang Dios sa ibabaw nato, ang Dios uban kanato, ang Dios sa sulod nato; ang pagkanaog sa Dios.

Didto sa Itaas, balaan, walay usang makahikap Kaniya, mipahimutang Siya sa ibabaw sa bukid; ug bisan pa kong ang mananap makatukbil sa bukid, kinahanglan mamatay.

Ug unya ang Dios mikanaog ug giilisan ang Iyang tolda, ug mikanaog ug mipuyo uban kanato, nahimong usa kanato. “Ug atong nahikap Siya,” ang Biblia nag-ingon. Sa Unang Timoteo 3:16, “Dili malalis nga daku gayud ang tinago sa pagkadiosnon; kay ang Dios nadayag diha sa unod, nahikap sa mga kamot.”

Ang Dios mikaon sa karne. Ang Dios miinum sa tubig. Ang Dios natulog. Ang Dios mihilak. Siya kaniadto usa kanato. Matahum, gitipo diha sa Biblia!

Mao kadto ang Dios sa ibabaw nato; ang Dios uban kanato; karon ang Dios ania sa sulod nato, ang Espiritu Santo. Dili ang ikatulong Persona; mao ra nga Persona!

<sup>44</sup> Ang Dios mikanaog ug nahimong unod, ug namatay sa kamatayon, diha kang Cristo; aron nga Iyang mahinloan ang Iglesia, aron nga makasulud dinhi niini, alang sa pagpakig-ambitay. Nahigugma ang Dios sa pagpakig-ambitay. Mao kanay katuyoan sa Iyang pagbuhat sa tawo sa unang higayon, alang sa pagpakig-ambitay; ang Dios nagapuyo nga nag-inusara, uban sa mga Kerubin.

<sup>45</sup> Ug timan-i karon, Iyang gibuhat ang tawo, ug ang tawo nahulog. Busa Siya mikanaog ug gitubos ang tawo, tungod kay ang Dios nahigugma nga pagasimbahon. Ang pinaka pulong nga *dios* nagkahulogan nga “tumong sa pagsimba.”

Ug kini nga nagaabot sa taliwala kanato, ingon sa Haligi nga Kalayo, ingon sa usa ka butang nga nagabag-o sa atong mga kasingkasing, kana ang mao ra nga Dios nga nag-ingon, “Mahimo ang kahayag,” ug dihay kahayag. Siya mao sa gihapon kagahapon, karon, ug hangtud sa kahangturan.

<sup>46</sup> Karon, sa sinugdanan ang Dios nagpuyo nga nag-inusara, kauban sa Iyang mga kinaiyahan, sama sa akong gisulti ganihang buntag. Mao kadto ang Iyang mga hunahuna. Walay bisan unsa kaniadto, ang Dios lamang, apan adunay Iyang mga hunahuna.

Sama sa usa ka bantugang arkitekto nga makapahimutang, diha sa iyang hunahuna, ug modibuho kong unsa kini ang iyang ginahunahuna nga iyang—nga iyang itukod. Magmugna, karon, dili siya makamugna. Iyang mahimo ang pagkuha’g butang nga binuhat na ug buhaton kini diha sa usa ka laing porma; kay ang Dios maoy bugtong paagi. . . ang Usa lamang nga makamugna. Apan iya nang ginahan-ay diha sa iyang salabutan kon unsay iyang pagabuhaton, ug mao kana ang iyang mga hunahuna, kanay iyang mga tinguha. Karon kini usa ka hunahuna, ug dayon ginapamulong niya kini, ug kini usa na ka pulong dayon. Ug ang—ang pulong mao. . .

<sup>47</sup> Ang usa ka hunahuna, sa diha kini gilitok, kini usa na ka pulong. Ang hunahuna nga gilitok mao ang pulong, apan kini kinahanglan una usa ka hunahuna. Busa, kini ang mga kinaiyahan sa Dios; dayon nahimo kining usa ka hunahuna, dayon usa ka pulong.

<sup>48</sup> Timan-i. Kadtong mga anaay, niining gabhiona, Kinabuhing Dayon, didto na uban Kaniya ug diha Kaniya, sa Iyang panghunahuna, sa wala pa gayu’y usa ka Manulonda, bituon, Kerubin, o bisan unsa pa. Kana Walay Katapusan. Ug kon ikaw

adunay Kinabuhing Dayon, ikaw anaa na niini kaniadto pa. Dili ang imong pagkatawo dinhi, kondili sa porma ug dagway nga ang walay kinutubang Dios. . .

<sup>49</sup> Ug kong Siya dili pa walay kinutuban, dili Siya Dios. Ang Dios kinahanglan nga walay kinutuban. Kita may kinutuban; Siya walay kinutuban. Ug Siya anaa sa tanang dapit, nasayod sa tanan, ug makagagahum sa tanan. Kong Siya dili pa, nan dili Siya mahimong Dios. Nasayod sa tanang mga butang, tanang dapit, tungod sa Iyang pagka-anaa sa tanang dapit. Ang pagkasayod sa tanan maoy nagahimo Kaniyang anaa sa tanang dapit. Siya usa ka Persona; Siya dili sama sa hangin. Siya usa ka Persona; Siya nagapuyo sa usa ka pinuy-anan. Apan maingon nga usa ka nasayod sa tanan, nasayod sa tanang butang, nagapahimo Kaniyang anaa sa tanang dapit, tungod kay Siya nasayod sa matag butang nga nagakahitabo.

Walay usa ka pulgas nga mopapilok sa iyang mga mata nga wala Niya hibaw-i kini. Ug Iya nang nahibaw-an kini sa wala pa ang kalibutan, kong pila ka higayon mopapilok kini sa iyang mga mata, ug unsa ka daghanang tambok ang anaa niini, bisan sa wala pa gayud ang kalibutan. Mao Kana ang walay kinutuban. Kita dili makatugkad niini dinhi sa atong mga salabutan, apan mao kana ang Dios. Dios, nga walay kinutuban!

<sup>50</sup> Ug hinumdumi, ikaw, ang imong mga mata, ang imong larawan, kung unsa ka man kanhi, diha ka na sa Iyang hunahuna sa sinugdanan. Ug ang bugtong butang nga mao ikaw mao ang paglitok, ang pulong. Human nga gihunahuna Niya kini, Iya kining gilitok, ug ania ka karon. Kon dili pa kini, kong wala ka kaniadto sa Iyang hunahuna, walay laing paagi gayud alang kanimong nga maatua didto, kay Siya ang Bugtong nagahatag sa Kinabuhing Dayon.

<sup>51</sup> Nahinum dum ba kamo kong giunsa nato pagbasa ang mga Kasulatan? “Dili kaniya nga nagabuut, o kaniya nga nagapaningkamot, kondili ang Dios!” Ug nga ang Iyang pagpamili nang daan mobarug nga tinuod, Siya makahimo sa pagpili, bisan sa wala pay panahon, kong kinsa. Ang Dios labing gamhanan diha sa Iyang pagpili. Nahibalo ba kamo niana? Ang Dios labing gamhanan.

Kinsay atua didto aron sultihan Siya’g usa ka mas maayong paagi sa pagbuhat sa kalibutan? Kinsa bay makapangahas sa pagsulti Kaniya nga Iyang gipadagan ang Iyang bulohaton nga sayup?

Bisan ang maong—ang maong Pulong, Mismo, labihan ka gamhanan. Bisan pa ang pinadayag labing gamhanan. “Siya nagapadayag kang kinsa Iyang padaygan.” Ang maong pinadayag, mismo, labing gamhanan diha sa Dios. Mao kana kon giunsa pagpangdukdok sa mga tawo sa mga butang, ug modasmag dayon diha sa mga butang, ug pagpanaway sa mga

butang, nga walay kahibalo kong unsay ilang ginabuhat. Ang Dios labing gamhanan sa Iyang mga buhat.

<sup>52</sup> Karon atong nakita Siya diha sa sinugdanan, ang Iyang mga kinaiyahan. Ug, karon, ikaw uban na Kaniya kanhi. Kaniadto pa mao kon kanus-a ang Basahon sa Kinabuhi nagaabot sa dayag.

Karon, atong nabasa dinhi sa Pinadayag sa ika-13 nga capitulo, sa ika-8 nga bersiculo, nga, “Ang mapintas nga mananap nga migimaw sa ibabaw sa yuta,” niining katapusang mga adlaw, “magapahisalaag sa kadtong tanang mga tawo sa yuta kinsang mga ngalan wala mahisulat sa Basahon sa Kinabuhi sa Cordero sa wala pa ang pagkatukod sa kalibutan.”

<sup>53</sup> Pamalandunga kini! Sa wala pa gayud matawo si Jesus, upat ka libo ka tuig sa wala pa Siya mianhi sa yuta, ug pipila ka linibo ka katuigan nga wala ka pa moabut sa kalibutan; si Jesus, diha sa hunahuna sa Dios, namatay alang sa mga sala sa kalibutan, ug ang Basahon sa Kinabuhi nahimo na, ug ang imong ngalan nabutang na diha nianang Basahon sa Kinabuhi sa wala pa matukod ang kalibutan. Mao kana ang Biblikanhong Kamatuoran. Kita n’yo, ang imong ngalan gikatagana na sa Dios ug gipahamutang diha sa Basahon sa Kinabuhi sa wala pa matukod ang kalibutan.

<sup>54</sup> Ikaw didto na sa Iyang mga kinaiyahan. Wala mo kini hinumdumi, wala, tungod kay kabahin ka pa lamang sa Iyang Kinabuhi. Ikaw kabahin sa Dios sa dihang nahimo kang anak nga lalaki o anak nga babaye sa Dios.

Maingon nga ikaw kabahin sa imong yutan-ong amahan! Husto kana. Mao ka. Ang lalaki maoy nagadala sa hemoglobin, ang dugo. Ug sa diha kana mahiadto na sa—sa itlog, dayon ikaw mahimo nang kabahin sa imong amahan; ug ang imong inahan kabahin sa imong amahan, usab; busa kamong tanan kabahin sa inyong amahan.

Mahimayaon! Kana maoy nagapahimulag sa denominasyon, sa hingpit. Uh-huh. Sa tinud-anay mao gayud! Ang Dios, diha sa tanan, ang bugtong dapit!

<sup>55</sup> Timan-i karon ang Iyang kinaiyahan. Kaniadto ang kinaiyahan mao, una, ang Dios; ang hunahuna, ang kinaiyahan mismo, ang tanan diha sa Usa, nga wala pa mapahayag. Unya sa diha Iyang gipahayag, sa sunod, Siya nahimo dayon nga Pulong. “Ug dayon ang Pulong nahimong unod ug mipuyo ipon kanato.”

<sup>56</sup> Sa San Juan ang ika-1 nga capitulo ug sa ika-1 nga bersiculo, timan-i, mao kini, “Sa sinugdan.” Apan, sa wala pa, ang Walay Katapusan! Timan-i, “Sa sinugdan mao na ang Pulong.” Sa diha ang panahon nagsugod, kato mao na ang Pulong. Apan sa wala pa kato nahimong Pulong, kato kinaiyahan, usa ka hunahuna. Dayon kato gipahayag, “Sa sinugdan mao,” ang pagpahayag, “ang Pulong.”

Karon kita paadto na kong hain si Melquisedec. Kana mao kining tulukibong Tawo. “Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios.” “Ug dayon ang Pulong nahimong unod ug mipuyo uban kanato.” Hupti kana diha karon, timan-i.

<sup>57</sup> Ang Iyang—Iyang unang pagkamao Espiritu, ang Dios, supernatural, tinuod, ang gamhanang Walay Katapusan. Ikaduha, Siya misugod pagporma sa Iyang Kaugalingon paingon sa pagka unod, diha sa usa ka *theophany*, kini gitawag “ang Pulong; usa ka lawas.” Kini dayon mao ang Iyang kahimtang sa diha Siya misugat kang Abraham, nga gitawag og Melquisedec. Siya tua sa porma sa theophany. Karon kita paingon na niana ug pamatud-an kini sa pipila ka mga gutlo, kong itugot sa Ginoo. Siya mao ang Pulong.

<sup>58</sup> Ang usa ka theophany mao kanang usa ka butang nga dili mo makita. Kini mahimo nga ania dinhi karon, pero dili mo makita kini.

Kini sama lamang, bueno, sama sa telebisyon. Nga anaa diha sa laing sukdanan. Ang telebisyon; may mga tawo nagalihok niining lawaka karon, nanag-awit; adunay mga bulok, usab. Apan ang mata nailalom lamang sa lima ka galamhan... Ang imong tibuuk nga pagkatawo nagnunot lang sa lima ka galamhan, diay. Ug ikaw nag-agad lamang sa kon unsay makita lang sa mata. Apan adunay lain pang sukdanan nga mahimong makita pinaagi’g usa ka kabalhinan, pinaagi’g telebisyon.

<sup>59</sup> Karon, ang telebisyon dili nagapamuhat sa hulagway. Ang telebisyon igo lamang magpalatay niini ngadto sa usa ka alagianan, ug dayon ang tabil sa telebisyon nagadawat niini. Apan ang hulagway tua na didto, sa sinugdanan pa. Ang telebisyon dinhi na sa dihang si Adan dinhi na. Ang telebisyon ania na sa dihang nagpahiluna si Elias sa bukid sa Carmelo. Ang telebisyon ania na sa dihang si Jesus nga taga Nazaret naglakaw sa kabaybayonan sa Galilea. Apan karon pa lang ninyo kini hikaplagi. Ilang dili matuohan kini kaniadto. Ikaw mahimong buang-buang kaniadto sa pag-ingon sa usa ka butang nga sama niini. Apan karon kini nahimo nang tinuod.

Ug ingon pod karon niini, nga ania si Cristo, ang mga Manulonda sa Dios ania. Ug sa umalabot nga adlaw, diha sa dakong Milenyum nga moabot, kini mamahimong labaw pang ka tinuud kay sa telebisyon o sa bisan unsa pang butang, tungod kay sila ania dinhi.

<sup>60</sup> Iyang ginapadayag ang Iyang Kaugalingon diha sa Iyang gamhanang porma kon unsa ang Iyang giingon, maingon nga Siya naga-*en morphe* sa Iyang Kaugalingon ngadto sa Iyang mga alagad ug nagapamatuod sa Iyang Kaugalingon.

<sup>61</sup> Karon, dinhi Siya ania diha sa porma sa Espiritu. Ug dayon Siya nagatungha diha sa porma sa usa ka...sa *en morphe*.

Karon, Siya mipakita kang Abraham, sa *en morphe*. Sa nagpauli si Abraham gikan sa pagpamatay sa mga hari, ania karon si Melquisedec, nakigsulti Kaniya.

<sup>62</sup> Sa miaging adlaw diha sa mantalaan sa Tucson, ako nagabasa sa usa ka articulo nga diin adunay usa—usa ka babaye nga nagmaniho sa dalan, akong gituohan nga hapit kap-atan, kalim-an ka milyas matag oras, ug iyang nabanggaan ang usa ka tiguwang lalaki nga nagsul-ob ug kapote. Siya misiaggit ug gihunong ang iyang sakyanan. Kini nagsalibay sa tiguwang lalaki diha sa kahanginan. Paingon deretso sa hawan nga disyerto! Ug ang babaye midagan pabalik aron pangitaon siya, ug siya wala na didto. Busa unsay iyang gibuhat? Pipila ka mga tawo sa iyang luyo nakakita niining panghitabo, nakita ang tiguwang lalaki nga milupad taas sa kahanginan, ug ang iyang kapote nagatuyok. Busa sila midalagan pabalik aron sa pagsuta. Dili na nila makita ang lalaki bisan diin. Ilang gitawag ang puwersa sa kapolisan. Ang polis mitungha aron sa pagsusi sa dapit; walay bisan kinsa didto.

<sup>63</sup> Bueno, ang matag usa kanila mipamatuod, “Ang sakyanan nagkanugkog, mibangga sa tawo. Siya milupad diha sa kahanginan, ug ang matag usa nakakita niini.” Mga saksi, ug duha o tulo sila ka mga sakyanan nga puno, nakita nila kini nga nahitabo. Nahibaw-an, sa lima na ka tuig nga milabay, dihay usa ka tiguwang lalaki nga nagsul-ob ug kapote, nabanggaan ug namatay diha gayud sa mao rang dapit.

Sa diha nga kamo mobiya na dinhi, kamo dili patay. Mobalik ka gayud, bisan pa kong ikaw usa ka makasasala, ug pagahukman sumala sa mga buhat nga nabuhat sa lawas. “Kong matun-as na kining yutan-ong payag, kita adunay usa nga nagahulat.” *En morphe*, mao kana ang pulong.

<sup>64</sup> Karon, ang Dios, niining hugna sa . . . Kini maoy hugna sa Iyang kabuhatan, nga unya naporma diha sa unod, si Jesus. Gikan sa unsa? Gikan sa halandong sinugdan, Espiritu, ug dayon mikanaog aron mamahimong Pulong, nga nagapadayag sa Iyang Kaugalingon. Ang Pulong wala pa una nagahimo sa Iyang Kaugalingon, igo lamang kini gipamulong, *en morphe*, unya Siya nahimo nang unod, si Jesus, may kamatayon, aron tilawan ang kamatayon alang kanatong tanan nga mga makasasala.

<sup>65</sup> Sa dihang gikatagbo Siya ni Abraham, Siya mao si Melquisedec. Dinhi Iyang ginapadayag kong unsa tanan nga pagahimoon sa kinaiyahan diha sa katapusan, sa matag anak ni Abraham. Ang matag anak sa Pagtoo magabuhat gayud sa samang butang. Apan buut kong bantayan kong unsaon nato kinahanglan sa pagduol.

<sup>66</sup> Usab, atong makita Siya nga gipadayag dinhi kang Ruth ug—ug Boaz, ingon nga usa ka Manunubos nga Kabanay, kong unsaon Niyang kinahanglan magpakatawo sa unod.



<sup>67</sup> Karon atong makita ang kinaiyahan, mga anak sa Iyang Espiritu, nga wala pa makasulud ngadto sa pormang-Pulong nga lawas. Apan, ang usa ka theophany; kining lawasa ubos sa pagbulot-an sa Pulong ug patinga, nagapaabot nga mahinamon, sa pagkausab sa lawas.

<sup>68</sup> Karon, ang kalainan tali Kaniya ug kaninyo, ingon nga usa ka anak. Kita n'yo, Siya mao na, sukad pa sa sinugdan, ang Pulong, usa ka *en morphe* nga lawas. Siya misulod ug mipuyo niana, diha sa Persona ni Melquisedec. Unya, dayon, wala na gayud kita makadungog pa kang Melquisedec, tungod kay Siya nahimong si Jesus Cristo. Si Melquisedec mao kadto ang Sacerdote, apan Siya nahimong si Jesus Cristo. Karon, inyong nasayloan kana. Tungod kay, diha sa nianang porma, Iyang nahibaloan ang tanang butang, ug bisan kanus-a wala pa gayud ninyo kana hibalo-i.

Kamo mitungha sama ni Adan, maingon kanako, kamo nahimo gikan sa kinaiyahan ngadto sa unod, aron nga tintalon. Apan kong kining kinabuhia matapos na dinhi, “Kong kining yutan-ong payag matun-as na, adunay usa nga nagapaabot kanato.” Mao kana’y atong padulngan; mao kana ang Pulong. Dayon makahimo na ta sa pagtan-aw balik ug makita kong unsay atong nabuhat. Karon dili pa kini nato hisabtan. Wala pa gayud kita mahimo nga Pulong; igo pa lamang kita nahimong unod nga tawo, dili Pulong.

<sup>69</sup> Apan, ug tan-awa, sa tataw gihimo kining tin-aw, dili ka gayud mahimong Pulong gawas kong ikaw usa ka hunahuna kanhi sa sinugdan. Mao kana ang nagapamatuod sa pagpangbuot nang daan sa Dios. Kita n'yo? Dili ka mahimong Pulong gawas kon ikaw usa ka hunahuna. Kinahanglan nga maatua ka sa panghunahuna, una.

Apan, nakita mo, aron ka makabarog sa mga pagtintal, kinahanglan nga imong saylo-an ang theophany. Kinahanglan nga mokanaog ka dinhi diha sa unod, aron pagatintalon sa sala. Ug unya, kong makabarog ka, “Ang tanan nga gihatag Kanako sa Amahan moari Kanako, ug pagabanhawon ko siya sa katapusang mga adlaw.” Kita mo, kinahanglan nga mamaingon ka una.

<sup>70</sup> Ug dayon, nakita ninyo, Siya mikanaog mismo, ang kasarangang laray, gikan sa kinaiyahan ngadto. . . Sa wala pa ang pagkatukod sa kalibutan, ang iyang ngalan nahisulat na sa Basahon sa Kinabuhi sa Cordero. Unya, gikan niana, Siya nahimong Pulong, ang theophany, nga makahimo pagtungha, mawala. Ug dayon nahimo Siya nga unod ug mibalik pag-usab, gibanhaw ang maong lawasa diha sa mahimayaong kahimtang.

Apan imong nasayloan ang theophany ug nahimong tawong unod, aron tintalon sa sala. Ug unya, “Kong matun-as na kining

yutan-ong payag, adunay usa nga nagpaabot na kanato.” Wala pa kanato ang maong mga lawasa.

<sup>71</sup> Apan, tan-awa! Sa diha nga kining lawas nagadawat sa Espiritu sa Dios, ang Kinabuhing dili mamatay sa sulud ninyo, kini maoy nagahimo niining lawasa nga masinugtanon sa Dios. Aleluya! “Siya nga gipanganak sa Dios dili nagahimo’g pagpakasala; dili siya makasala.” Roma 8:1, “Busa wala nay pagkahinukman karon kanila nga anaa kang Cristo Jesus; wala sila maglakaw uyon sa unod, kondili uyon sa Espiritu.” Mao na na. Kita n’yo, mao na’y nagahimo sa inyong lawas nga masinugtanon.

Dili na kinahanglan nga moingon ka, “Oh, kong makahimo lang ako pag undang sa pag-inom! Kong makahimo lang ako...” Sulod lang kang Cristo, ug kini tanan mawala, kita n’yo, kita n’yo, tungod kay ang inyong lawas nailalum sa pagbuut sa Espiritu. Dili na kini magmasinugtanon pa sa mga butang sa kalibutan; patay na sila. Nangamatay na sila; ang inyong mga kasal-anan gilubong na diha sa bautismo, ug kamo bag-o nang binuhat diha kang Cristo. Ug ang inyong lawas, nagmasinugtanon na sa Espiritu, nga naninguha sa pagkinabuhi sa usa ka matang sa matarung nga kinabuhi.

<sup>72</sup> Sama kaninyong mga kababayan-an nga nagaingon nga nakadawat na kamo sa Espiritu Santo, ug nagaanhi dinhi nga nagasul-ob og mga purol ug samang mga butang, giunsa man nga mabuhay n’yo kini? Giunsa man sa Espiritu sa Dios diha kaninyong makatugot aron mobuhat ug ingon nianang butanga? Dili kini mamahimo nga ing-ana. Sa pagkatinuod, dili kini mahitabo. Dili Siya usa ka mahugaw’ng espiritu; Siya usa ka balaang Espiritu.

<sup>73</sup> Ug dayon sa dihang masinugtanon ka na nianang Espiritu, kini maoy nagapailalum sa imong tibook nga pagkatawo nga magmasinugtanon nianang Espiritu. Ug kanang maong Espiritu walay lain sa kalibutan kondili kining Binhi nga Pulong nga nadayag, o nabuhi, aleluya, gibuhi. Ug sa diha nga miingon ang Biblia, “Ayaw’g buhata *kini*,” kanang maong lawas sa kalit mosunod Niini. Wala nay pangutana.

Ug unsa kini? Kini maoy patinga sa pagkabanhaw. Kining lawasa banhawon pag-usab, tungod kay gisugdan na kini. Kini kanhi nailalum sa sala, ug kahugawan ug pagkadunot, apan karon nakabaton na kini sa patinga; nahimo na kining Langitnon. Karon, kana maoy patinga nga ikaw makauban sa Pagsakgaw. Kini mao ang patinga.

<sup>74</sup> Ang tawong masakiton nga nagahigda, nga himalatyon, wala nay nahabilin pa gawas sa kamatayon; mao na lang kana ang mahimong mahitabo. Ako nakakita na sa landong sa mga tawo, nga human gikaon na sa kanser ug tuberculosis; ug makita sila nga mga tawo, unya pagkahuman niana, hingpit nga ayo na ug

himsog. Kong wala pay Langitnong pagpang-ayo, nan walay pagkabanhaw, tungod kay ang Langitnong pagpang-ayo maoy patinga sa pagkabanhaw. Amen!

<sup>75</sup> Nasayod ba kamo kong unsa ang salaping patinga, wala pa? Kini maoy pasiunang bayad. “Siya gisamaran tungod sa atong mga kalapasan; pinaagi sa Iyang mga labod kita nangaayo.” Timan-i kong unsa ka kahibulongan! Atong gihigugma Siya.

<sup>76</sup> Karon, kining lawas ilalum na sa pagbuut sa Espiritu. Wala pa makasulud diha sa porma nga Pulong, apan ania pa kita sa unod nga porma, hinoon nagmasinugtanon diha sa Pulong. Ang kamatayon dinhi sa unod maoy magdala kanato didto.

<sup>77</sup> Mao ra nga butang, pamalandunga ang usa ka gamay’ng bata. Mahimong sulundan mo ang usa ka babaye, bisan pa kong unsa siya kadautan, sa dihang nagsabak na siya ug mamahimong inahan. Bantayi, sa dili pa matawo kanang maong bata, dili ko igsapayan kong unsa kapintas ang maong babaye, nagakahimo siyang buutan. Adunay usa ka butang diha sa iyang pagkalukmay. . . morag diosnon paminawon, nga makita sa usa ka inahan nga nangandam sa pagkahimong inahan, tungod sa bata. Ngano man kini? Kanang gamay’ng lawas, karon, dili pa kini buhi, kita n’yo, ang bugtong butang niini mao nga unod pa lang ug mga muskulo. Kanang gamay’ng pag-igking, mga muskulo pa lang kana nga naga-igpot. Apan sa dihang kini nagagawas na gikan sa tago-angkan, ginahuypan kini sa Dios sa gininhawa sa kinabuhi, ug dayon siya nagahilak. Kita n’yo, sama lang sa—sama sa kasigurado nga anaay usa ka natural nga lawas nga ginamugna, adunay espirituhanong lawas nga modawat niini sa diha nga kini motungha na dinhi.

<sup>78</sup> Dayon, sa diha ang tawo matawo na pag-usab, gikan sa Langit, siya nahimo nga bata sa espiritu diha kang Cristo.

Ug, dayon, sa diha kining bisting unod mahibulag na, anaay usa ka tiunay’ng lawas, theophany, usa ka lawas nga dili binuhat sa mga kamot, ni nahimugso sa usa ka babaye, nga maoy atong adtoan.

Dayon kanang maong lawas nagabalik ug nagakuha sa mahimayaong lawas.

Mao kana ang hinungdan nga si Jesus mikanaog sa hades sa dihang Siya namatay, ug miwali ngadto sa mga kalag sa bilangoan; mibalik niadtong theophany. Oh, pagkahibulongan! Salamat sa Dios!

<sup>79</sup> Ikaduhang Mga Taga Corinto 5:1, “Kong kining yutan-ong lawas matun-as na, kining yutan-on nga payag, adunay atong usa.” Kita n’yo, atong nasayloan kana, aron moanhi laktud gikan sa Dios, ang kinaiyahan; aron mahimong unod, aron tintalon ug sulayan pinaagi’g sala, sama kang Adan nga gibuhat. Apan sa diha ang pagsulay sa Iyang Pulong matapus na, nan pagadadon na kita ngadto niining lawas nga giandam alang kanato sa

wala pa ang pagkatukod sa kalibutan. Kini mao ang Pulong didto nga atong gilaktawan, aron moanhi dayon mismo, dinhi aron pagatintalon ug sulayan. Kon mianhi lamang kita nga nag-agi niana, wala untay pagsulay; tanan untang butang atong nasayran. Mao kanay hinungdan nga si Jesus nasayod sa tanang butang, tungod kay Siya Pulong sa wala pa Siya nahimong unod. Dayon kita mahimong Pulong.

<sup>80</sup> Dinhi kita giporma diha sa dagway nga Pulong, aron mahimong umalambit sa Pulong, nagakaon diha sa Pulong, pinaagi sa pagkagibut-an nang daan sukad sa sinugdan; nasabtan ninyo kanang gamay'ng kidlap sa Kinabuhi nga anaa na diha kaninyo sukad pa sa sinugdan, sa pagsugod ninyo sa inyong panaw. Daghan kaninyo ang makahinumdom niini. Nagpasakop kamo *niining* simbahan ug nagpasakop *nianang* simbahan, mosulay kamo *niini* ug *niana*; walay pagkatagbaw. Husto kana. Apan usa ka adlaw inyo na lang naila Kini. Husto.

<sup>81</sup> Sa miaging gabii nagatudlo ako sa laing dapit, nagtoo ako nga sa California kadto o sa Arizona, mahitungod. . . Ako nagtoo nga ako nang nasaysay ang gamay'ng sugilanon dinhi, bahin sa usa ka tawo nga nagpalumlum ug usa ka himongaan ug may usa ka itlog sa agila sa ilalum niini. Ug sa pagkapiso sa agila, siya maoy pinakakataw-anan nga langgam tan-awon nga nakita sa kadtong mga manok sukad. Apan, milakaw siya sa palibot. Siya maoy—siya maoy bugtong maut kanilang tanan, tungod kay dili gayud siya makasabot nganong kanang himongaan mokurukutok ug mangakha diha sa hugaw'ng nagtapok ug mangaon. Dili niya mahisabtan. Ang himongaan moingon, “Dali ngari ug pag pista, minahal!” Apan, usa siya ka agila; dili siya mokaon ug sama niana. Dili kini iyang pagkaon.

<sup>82</sup> Busa mangdakup siya ug mga talapan ug kung unsa pa, nasayod na mo, ug tawgon ang mga gagmay'ng piso. Ug silang tanan nga mga piso manguyog, mopyak silang nagauban, ug mokaon. Apan ang piso nga agila dili makahimo niini. Dili kini—dili husto tan-awon alang kaniya.

Busa usa niana ka adlaw ang iyang inahan miabot nga nagapangita kaniya.

<sup>83</sup> Ug iyang madungog kanang himongaan mikurukutok. Siya mosulay'g ayo sa iyang kaugalingon sa pagkurukutok, apan dili kini niya mahimo. Misulay siya pagpiyak-piyak sama sa piso, apan dili kini niya mahimo. Kita n'yo, usa siya ka agila. Siya, sa sinugdanan pa, usa na siya ka agila. Igo lamang siya napiso ilalum sa himongaan.

Sama kana sa ubang mga membro sa simbahan. Ang matag. . . Mao pud kana ang nagakahitabo karon; mga usa sa mga panghitabo, maoy tinuod.

<sup>84</sup> Apan usa niana ka adlaw ang iyang inahan milupad sa ibabaw, ug kini misiyagit. Naila niya kini. Husto kanang tingoga. Ngano? Usa siya ka agila, sa sinugdanan.

Mao pud kini sa Maayong Balita, o sa Pulong, o sa Gahum ni Jesus Cristo. Kon ang tawo gikabut-an nang daan alang sa Kinabuhing Dayon, iyang nagakadunggan kanang matuod nga bagting, singgit sa Dios, walay makababag kaniya gikan Niini.

Ang iglesia tingalig moingon, “Miagi na ang mga adlaw sa mga milagro,” putak, putak, putak. “Tindog diri ug kaon *niini*, ug tindog diri ug kaon *niana*.”

<sup>85</sup> Kanang pagkaon diha sa nataran dili na makapadani kaniya, gayud. Wala na Siya! “Ang tanang butang mahimo!” Mialsa na siya sa yuta.

Mao kana kung ngano, ang butang sa kadaghanang mga Cristohanon karon, dili nila maalsa ang ilang mga tiil gikan sa yuta.

Ang idarang inahan miingon, “Lukso, anak! Usa ka ka Agila. Lupad ngari diin ania ako.”

Matud niya, “Ma, sa tibuuk kong kinabuhi, wala pa ako makalukso.”

<sup>86</sup> Matud niya, “Buena, molukso ka! Usa ka ka agila, sa sinugdan pa. Dili ka usa ka manok.” Busa iyang gibuhat ang iyang unang paglukso ug gikapakapa ang iyang mga pako; dili ra kaayo maayo ang nahimo, apan nakalupad na siya gikan sa yuta.

Ingon niana ang atong ginabuhat. Atong ginadawat ang Dios pinaagi sa pagtoo, pinaagi sa sinulat nga Pulong. Anaay usa ka butang diha niana; kini mao kanang Kinabuhing Dayon. Gikabut-an ka na ngadto niini.

<sup>87</sup> Ang iyang apohan nga lalaki ug babaye mga agila. Siya usa ka agila, sa tibuuk kagikan. Ang agila dili makig-ipon uban sa laing mga butang. Dili siya usa ka sinagolan; dili. Usa siya ka agila.

<sup>88</sup> Dayon, human mo naila ang pinaka Pulong sa Dios nga mao ang Pagkaong Agila, dayon imo nang gitalikdan ang laing butang. Niana ikaw naumol na diha sa dagway sa buhing Dios. Ikaw nakadungog gikan sa imong theophany. “Kong kining yutan-ong lawas matun-as na, adunay usa nga naghulat kanato.”

Moingon kamo, “Husto ba kana, Igsoong Branham?”

Buena, magkuha ta ug duha ka mga agila ug tan-awon sila sa pipila ka mga gutlo. Dihay usa ka ngalan, tawong ginganlag Moises. Ang matag usa nasayod nga ang usa ka propeta gitawag ug agila, diha sa Biblia.

<sup>89</sup> Dihay usa ka propeta nga ginganlag Moises. Ug usa niana ka adlaw gitawag siya sa Dios, ug dili motugot kaniya nga

makaadto sa kayutaan, ug siya—siya namatay diha sa ibabaw sa Bato. Ang mga Manulonda nagkuha kaniya ug gilubong siya.

Aduna pay laing tawo, usa ka agila, nga dili gani kinahanglan mamatay. Igo lang siya milakaw tabok sa Jordan, ug ang Dios nagpadala ug karwahi; ug kining bisti nga unod iyang gihibulagan, ug mipasaka ug misalo sa walay katapusang ganti.

Milabay ang walo ka gatus ka katuigan, milabay ang walo ka gatus ka katuigan, sa ibabaw sa Bukid sa Pagkausab sa Dagway, niini mitindog kadtong duha ka lalaki. Nadunot na ang lawas ni Moises sa gatusan ka mga katuigan, apan ania siya sa usa ka porma hangtud nga bisan si Pedro, Santiago, ug si Juan nakaila kaniya. Amen! “Kong matun-as na kining yutan-ong tabernaculo,” kong ikaw usa ka kinaiyahan sa Dios nga napahayag dinhi sa ibabaw sa yuta, “aduna kay usa ka lawas nga nagpaabot kong mobiya ka na niining kalibutana.” Didto sila, nagatindog sa ibabaw sa Bukid sa Pagkausab sa Dagway, diha sa ilang theophany. Tungod kay, sila mga propeta kang kinsa ang Pulong miabot.

<sup>90</sup> Usab atong tan-awon ang usa pa ka propeta, usa ka higayon, sa ngalan nga Samuel. Usa siya ka bantugang lalaki. Iyang natudloan ang Israel; giingnan niya sila nga sila wala dapat usa ka hari. Matud niya, “Nagsulti na ba ako ug usa ka butang kaninyo sa Ngalan sa Ginoo kondili kon unsa ang nangatuman?”

Matud nila, “Wala man. Ang tanang butang nga kanunay nimong gisulti sa Ngalan sa Ginoo nangatuman gayud.”

Siya usa ka propeta, ug namatay siya.

<sup>91</sup> Hapit tulo o upat ka tuig ang milabay, ang hari nagkaadunay suliran; kadto sa wala pa ang Dugo ni Jesus Cristo maula. Siya tua kaniadto sa paraiso. Ug ang usa ka espiritista sa Endor gitawag ang usa ka tawo sa pagduol, ug lingawon si Saul. Ug sa pagkakita kaniya sa espiritista nga nagatindog, siya miingon, “Nakakita ako’g dios nga nagagula gikan sa yuta.”

<sup>92</sup> Ug human nga ang maong tawo dugay na nga namatay, gilubong, ug nadunot na diha sa lubnganan, ania karon siya nagatindog didto sa langub, nga nagsul-ob sa iyang saput sa pagka propeta; ug propeta sa gihapon, amen, tungod kay miingon siya, “Nganong gitawag mo ako gikan sa akong pagpahulay, sanglit nahimo kang kabatok sa Dios?” Bantayi siya nga nagapanagna. “Ugma sa gabii, sama niining taknaa, ikaw makauban nako.” Siya propeta pa sa gihapon, bisan kon kaniadto wala na siya niining lawasa.

Kita n’yo, siya nahianhi ug kabahin niadtong maong Pulong, ug misulud siya gikan sa unod nga kinabuhi balik ngadto sa lawas nga giandam na alang kaniya sa wala pa ang pagkatukod sa kalibutan. Misulud siya ngadto sa theophany, nga mao ang

Pulong. Nasabot kini ninyo? Mao kana ang adtoan sa tanang mga magtotoo kong mobiya na ta dinhi.

<sup>93</sup> Unya, sa nianang maong porma, ang tabil dayon gibuksan. Nakita ninyo, kamo ang Pulong, usab, sa diha nga kamo nagsulod na didto. Maingon sa usa ka gamay'ng bata; sa gikaingon ko na dili pa lang dugay . . .

<sup>94</sup> Karon timan-i. Dalaygon ang Dios tungod niining pag-abli sa mga Timri, mao ang akong pag-ampo, nga masayran kining mga butanga!

<sup>95</sup> Karon ang tinuud nga pinadayag mahitungod kang Melquisedec ginapakita na sa dayag. Unsa? Siya ang Dios, ang Pulong, sa wala pa Siya nahimong unod; Ang Dios, ang Pulong. Tungod kay, Siya kinahanglan gayud ingon niana; walay si bisan kinsang mahimong walay kamatayon sama Kaniya. Kita n'yo, ako adunay amahan ug inahan; kamo, usab. Si Jesus adunay amahan ug inahan. "Apan kining Tawhana walay amahan, o walay inahan." Si Jesus dunay panahon nga Siya nagsugod; kining Tawhana wala. Gihatag ni Jesus ang Iyang kinabuhi; kining Tawhana dili makahimo, tungod kay Siya mao ang Kinabuhi. Ug kini mao ra nga Tawo sa tanang panahon. Nagapanghinaot ako nga ipadayag kini sa Dios kaninyo. Ang mao rang Tawhana, sa tanang panahon.

<sup>96</sup> Timan-i ang Iyang titulo, "Hari sa pagkamatarung." Karon, sa Mga Hebreohanon 7:2, "Hari sa pagkamatarung, ug Hari sa pakigdait." Duha Siya ka mga hari. Karon bantayi, Mga Hebreohanon 7:2, "Hari sa pagkamatarung, usab ang Hari sa pakigdait." Duha Siya diha ka mga hari. Karon tungod kay mianhi Siya sa unod ug gidawat ang Iyang lawas sa itaas, diha sa Pinadayag 21:16, gitawag Siya nga, "Hari sa mga hari." Siya na-tulo na, tanan. Kita n'yo, Haring Dios, Haring Theophany, Haring Jesus. "Siya mao ang Hari sa mga hari."

Kining tanan nagkaangay, maingon sa kalag, lawas, ug espiritu, ang tanan nanag-abot aron mahimong usa.

<sup>97</sup> Usab, Siya mao ang Amahan, nga mao ang una; Anak; ug Espiritu Santo, ang Espiritu.

"Hari sa pagkamatarung," ang kinaiyahan nga Espiritu; theophany, "Hari sa—sa pakigdait," theophany; ug diha sa unod Siya mao ang "Hari sa mga hari," mao ra nga Persona.

<sup>98</sup> Sa diha ang theophany, nakita Siya ni Moises, Exodus 33:2, Siya usa ka theophany. Si Moises gusto makita ang Dios. Iyang nadungog ang Iyang tingog, nadungog niya Siya nga nakigsulti kaniya, nakita niya Siya didto sa usa ka sapinit, sama sa dakong Haligi nga Kalayo. Ug miingon siya, "Kinsa Ka? Buut kong mahibaloan kong Kinsa Ka." Matud ni Moises. "Akong ibutang. . ." "Kong tugotan Mo ako nga makakita Kanimong buut kong makakita sa Imong nawong."

<sup>99</sup> Miingon Siya, “Walay tawo nga makahimo pagtan-aw sa Akong nawong.” Miingon Siya, “Akong ibutang ang Akong kamot sa imong mga mata, ug molabay Ako. Ug makita mo ang Akong likod, apan dili ang Akong nawong.” Kita n’yo? Ug sa dihang Iyang gibuhat, kadto usa ka likod sa Tawo; kadto usa ka theophany. Dayon ang Pulong nga nag-abot kang Moises, “AKO MAO,” kadto mao ang Pulong. Ang Pulong miabot kang Moises sa porma nga Haligi nga Kalayo diha sa nagdilaab nga sapinit, ang “AKO MAO.”

<sup>100</sup> Maingon nga ang Pulong gikan sa teolohiya...gikan sa theophany, diay. Pasayloa ako. Miadto Siya kang Abraham ingon nga usa ka Tawo, ilalum sa kahoy’ng encina. Karon tan-awa didto. Dihay Tawong miadto kang Abraham, tulo sila, ug nanglingkod sa ilalum sa kahoy’ng encina, tulo sila. Ug matikdi, tapus Siya nakigsulti kang Abraham . . .

<sup>101</sup> Nganong miabot man Siya? Si Abraham, ingon nga usa nga may saad ug may mensahe mahatungod sa umalabot nga anak nga lalaki, ug usab siya mao ang Pulong nga propeta sa Dios nga nagasalig sa Pulong sa Dios, nga nagatawag sa bisan unsang butang nga supak ingon nga kini dili. Kita ninyo kung unsa ka hingpit ang Pulong? Ang Pulong miabot ngadto sa propeta. Kita n’yo, kadto mao ang Dios diha sa theophany. Ug ang Biblia nag-ingon, “Ang Pulong naga-abot sa propeta.” Ug ania ang—ang Pulong diha sa theophany.

Karon moingon kamo, “Mao ba kadto ang Dios?”

<sup>102</sup> Si Abraham miingon nga mao kadto. Siya miingon ang Iyang ngalan, mao, gitawag niya Siya nga Elohim. Karon sa Genesis 1, inyong makita, “Sa sinugdan si *Elohim* nagbuhat sa mga langit ug yuta.” Sa Genesis 18, atong makita nga—nga gitawag ni Abraham kining Tawhana . . . nga nanglingkod didto ug nakigsulti kaniya, ug makahimo sa pagtug-an kaniya sa mga tinago sa iyang kasingkasing, nagatug-an kaniya kong unsa ang ginahunahuna ni Sara sa Iyang luyo. Si Abraham miingon, “Kini mao si Elohim.” Diha Siya sa theophany nga porma. Nasabot ba ninyo kini? Timan-i pagkahuman . . .

<sup>103</sup> Karon atong nahibaloan nga diha Siya kaniadto sa porma sa theophany. Iyang gitawag Siya, “Ginoong Dios, Elohim.” Karon, diha sa Genesis 18, atong makita nga kana tinuud.

<sup>104</sup> Karon matikdi si Abraham. Dihay tulo kanila nga nagkuyog, apan sa diha nga gitagbo ni Abraham ang tulo, siya miingon, “Akong Ginoo.”

Apan sa dihang si Lot, didto sa Sodoma; duha kanila milugsong didto, ug nakita ni Lot nga duha sila nga nagsingabot, ug miingon siya, “Akong mga ginoo.” Kita n’yo, unsa may nahitabo? Sa una daan, si Lot dili usa ka propeta, husto kana, o ni siya mao ang mensahero sa maong panahon, busa walay bisan unsang iyang pinadayag mahitungod Kaniya. Husto gayud kini.



Mahimong tawgon sila ni Lot “mga ginoo.” Usa sila ka dosina, makaingon sa gihapon siya, “mga ginoo.”

Apan bisan pa kon pila ang nakita ni Abraham, Kini sa gihapon usa ka Ginoo. Kato ang Dios. Kato mao ang Melquisedec.

<sup>105</sup> Timan-i, sa pagkahuman na sa gubat, si Melquisedec nagsilbi'g komunyong sa madaugon Niyang anak; hunahunaa kana, ang bahin sa Iyang Kaugalingon! Karon gusto natong tanawon dinhi. Diha sa tipo niini, diha sa pagtan-aw, sa komunyong. Human sa gubat, gibahin Niya ang Iyang Kaugalingon, tungod kay ang komunyong kabahin ni Cristo. Ug pagkahuman na sa pagpakigbisog, human na nga nalatus na ang imong kaugalingon, nan mao na ang pag-ambit mo kang Cristo, mahimong kabahin na niining Persona. Nakuha n'yo kini?

<sup>106</sup> Si Jacob nakigdumog tibuuk gabii, ug wala niya Siya buhi-i hangtud nga gipanalanginan Niya siya. Husto kana. Nakigbisog alang sa Kinabuhi! Ug sa pagkahuman na sa gubat, dayon ang Dios ginahatag kanimo ang Iyang Kaugalingon. Mao kana ang Iyang matuud nga komunyong. Ang gamay'ng tinapay ug ostya igo lang maglarawan Niini. Dili mo kini dawaton gawas kon nakapakigdumog ka na ug mahimong kabahin sa Dios.

<sup>107</sup> Hinumdumi, niining panahona, ang komunyong wala pa gayud gipatuman, wala hangtud nga sa wala pa namatay si Jesus Cristo, gatasan ug gatasan ug gatasan ka tuig pa ang milabay.

<sup>108</sup> Apan si Melquisedec, human sa Iyang anak nga si Abraham nagmadaugon, gisugat siya ni Melquisedec ug gihatagan siya'g bino ug tinapay; nagapakita nga tapus niining yutan-ong pakig-away, atong sugaton Siya sa kalangitan ug magkomunyong pag-usab. Mao kini ang Kombira sa Kasal. “Dili na Ako moinum ug bino, ni mokaon sa bunga, hangtud nga uban kaninyo mokaon ug moinum Ako niini, pag-usab, didto sa Gingharian sa Akong Amahan.” Husto ba kana?

<sup>109</sup> Matikdi pag-usab, si Melquisedec niadto aron sugaton si Abraham sa wala pa siya nakabalik sa iyang pinuy-anan. Daw unsa ka maanindot nga tipo dinhi nga anaa nato! Si Melquisedec nagatagbo kang Abraham sa wala pa siya makauli sa iyang puy-anan, human sa pakig-away.

Atong matagbo si Jesus sa kahanginan, sa dili pa kita moabut sa Puloy-anan. Husto kana. Ang Ikaduhang Mga Tesalonica nagatug-an kanato niana, kay, “kita magasugat Kaniya diha sa kahanginan.” Usa ka maanindot nga tipo kang Rebecca nga nagasugat kang Isaac, diha sa kapatagan, sa kabugnaw sa adlaw. “Kita magasugat kaniya diha sa kahanginan.” Ingon niini ang giingon kanato sa Ikaduhang Mga Tesalonica. “Kay kita nga mga buhi pa nga mahabilin dili magauna o magapugong kanila nga nangamatay; kay ang trumpeta sa Dios patingugon; ang mga nangamatay diha kang Cristo mouna sa pagpamangon; kita nga

mga buhi pa nga nahabilin pagasakgawon uban kanila, aron sa pagsugat sa Ginoo diha sa kahanginan.” Hingpit, kining tanan nga mga tipo.

<sup>110</sup> Busa, ang theophany, kong ikaw namatay na ug misulud nianang theophany, (unsay nagakahitabo?) ang theophany nagakanaog sa kalibutan aron kuhaon ang lawas nga tinubos. Ug kong ikaw ania sa kahanginan, kuhaon mo kanang lawas aron mosugat sa theophany, diha ka na, “ug sakgawon pahitaas, ug mosugat sa Ginoo diha sa kahanginan.”

<sup>111</sup> Kinsa kining si Melquisedec kondili ang Dios!

<sup>112</sup> Karon atong makita dinhi sa tataw ang tibuok tinago sa atong mga kinabuhi diha sa panaw, ug kamatayon, ug kon asa ta paingon human kita mamatay. Usab, ang pagpangbuut nang daan anaa na sa tin-aw’ng talan-awon dinhi. Karon paminaw samtang atong ginatudlo kini, pag-ayo.

<sup>113</sup> Ang mga ang’ang sa—sa Walay Katapusang katuyoan nga atua Kaniya diha sa Iyang tinago kaniadto karon napadayag na. Timan-i, anaa pay sa gihapon tulo ka mga ang’ang ngadto sa kahingpitan. Sama lang nga Iyang ginatubos ang kalibutan; sa mao gihapong pamaagi Iyang ginatubos ang Iyang Iglesia. Iyang ginatubos ang katawhan sa tulo ka mga ang’ang. Karon tan-awa. Una mao ang pagpamatarung, sama sa giwali ni Luther; ang ikaduha, pagbalaan, sama sa giwali ni Wesley; ang ikatulo, bautismo sa Espiritu Santo. Husto kana. Ug dayon nagaabot ang Pagsakgaw!

<sup>114</sup> Karon, ang kalibutan, giunsa Niya pagtubos sa kalibutan? Ang una, unsay Iyang gibuhat, sa diha kini nakasala, Iyang gihugasan kini diha sa bautismo sa tubig. Husto kana. Dayon Iyang gipatulo ang Iyang dugo sa ibabaw niini, gikan sa krus, ug gibalaan kini ug gitawag kini nga Iyaha. Ug unya unsay Iyang ginabuhat? Maingon nga Iyang gilangkat tanan ang pagkakalibutanon gikan kanimo, ug giusab ang tibuok butang pinaagi sa bautismo sa kalayo sa Espiritu Santo, Iya pod bag-ohon ang kalibutan. Ug pagasunugon kini pinaagi’g Kalayo, ug hinloan ang matag hugaw, sa minilyon ka milyas ang kahabog, ang tanang butang pagahinloan. Ug dayon anaa nay Bag-ong Langit ug Bag-ong Yuta, sama kanimo nga usa ka bag-ong binuhat diha kang Cristo Jesus sa diha nga ang Espiritu Santo mao na ang magdumala kanimo. Kita n’yo, mao na, kining tibuok butang maingon nga klaro na sama nga mahimo kini. Ang tanang butang anaa diha sa tulo.

<sup>115</sup> Ang natural nga pagkahimugso pinasubay sa tulo. Unsay unang nagakahitabo sa babaye nga nagapanganak? Unsay unang nagagula? Tubig. Unsay nagagula sunod? Dugo. Unsa ang sunod moabot? Kinabuhi. Tubig, dugo, espiritu.

Unsay nagakahitabo sa tanum? Nagakadunot. Unsay unang butang? Banay. Unsa ang sunod? Uhay. Unsa ang sunod? Tipaka.

Ug dayon ang lugas nagagula gikan niana. Sa tulo lamang ka mga ang'ang niini, hangtud nga kini mosangko sa lugas. Kanay husto.

<sup>116</sup> Ginapamatud-an sa Dios kana. Kanunay'ng husto kana. Ginapamatud-an sa Dios kini nga maoy tinuod. Nagapakita sa yano, ang gikabut-an nang daan mao ray bugtong nga gitagad diha sa katubsanan. Nakuha ba ninyo kini? Sultion ko kana pag-usab. Ang gikabut-an nang daan mao ray bugtong gitagad diha sa katubsanan. Ang mga tawo tingalig magdahum nga sila, nga sila mao, apan ang matuod nga gitubos mao lamang kadtong gikabut-an nang daan. Tungod kay, ang pulong nga *tubos* nagkahulogan nga “dad-on pagbalik.” Husto ba kana? Ang *tubos* maingon nga... Ang *pagtubos* sa bisan unsang butang, mao ang, “pagdala niini balik sa iyang naandang dapit.” Aleluya! Busa ang gikabut-an nang daan mao lang ang madala pagbalik, tungod kay ang uban wala magagikan Didto. Kita n'yo, “dad-on balik!”

<sup>117</sup> Maingon nga uban na Kaniya sa Walay Katapusan, sukad sa sinugdan... Ang Kinabuhing Dayon nga tua na kaninyo, ang Iyang hunahuna kong unsa ka kaniadto, lamang, gigusto Niya nga kamo... Gigusto Niya nga motindog ako sa pulpito, ingnon ta. Gigusto Niya nga kamo molingkod diha sa lingkoranan niining gabhiona. Ug niana kita nag-alagad sa Iyang Walay Katapusang katuyoan. Ug ang mibiya sa puluy-anan, mianhi lamang sa kalibutan aron pagtuman sa Iyang katuyoan. Husto ba kana? Sige. Dayon, human kini natapos na, kini gibalik sa mahimayaon'g kahimtang; kini nahamtong ug gibalik pag-usab.

<sup>118</sup> Dili ikahibulong nga si Pablo nakahimo sa pag-ingon, sa dihang nagabuhat sila'g punggutan aron pungguton ang iyang ulo; matud niya, “O kamatayon, hain na man ang imong ikot? O lubnganan, hain na ang imong pagkamadaugon? Apan salamat sa Dios si Kinsa nagahatag kanato'g kadaugan!” Matud niya, “Kamatayon, sultihi ako kong hain mo ako mahimong mapasinggit! Lubnganan, sultihi ako kong unsaon mo pagpugong kanako! Tungod kay, ako tagkupert sa Kinabuhing Dayon.” Amen! Naila niya kini. Kamatayon, hades, lubnganan, walay makapugong kaniya. Ug walay makapadaot kanato, nga anaay Kinabuhing Dayon! Iyang naila nga siya gipanalanginan sa Kinabuhing Dayon.

<sup>119</sup> Sama sa usa ka gamay'ng yamog. Kong nasabtan ko kini, kini maoy... Wala ako kaayo masayod bahin sa chemistry. Apan, kini mao gayud ang—ang pagbagtok sa kaumog o kahanginan. Ug sa dihang nagakabugnaw ug nagkangitngit na ang kagabhion, kini nagakahulog gikan sa kalangitan ug nagakatulo ibabaw sa yuta. Kini nagkahulog gikan sa kon asa. Apan sa pagkabuntag sa dili pa mosilang ang adlaw, kini ana lang diha, kanang gamay'ng butang, nagkurog. Apan pasagdi nga mosubang ang

adlaw, bantayi kini paingon sa pagsilak. Malipayon kini. Ngano? Ang adlaw magatawag na niini pagbalik diin kini nagagikan.

Ug mao pud kana sa usa ka Cristohanon. Aleluya! Nahibalo kita nga sa diha kita nagalakaw pasulod sa Presensiya sa Dios, duna sa atong sulud nga nagaingon nga kita nagagikan sa usa ka dapit, ug kita magabalik pag-usab pinaagi nianang Gahum nga nagahugot kanato.

<sup>120</sup> Ang gamay'ng yamog, siya nagakidlap ug nagasilak ug nagasinggit, tungod kay siya nahibalo nga siya gikan didto sa itaas, ug kanang adlaw mao ang magapabalik kaniya sa itaas pag-usab.

Ug ang usa ka tawo nga usa ka kinaiyahan sa Dios, gipanganak sa Dios, nahibalo, aleluya, sa dihang matagbu niya ang Anak sa Dios, siya sa umalabot pagakuhaon gikan dinhi. "Tungod kay kong igaisa na Ako gikan sa yuta, kabigon Ko ang tanang katawhan ngari Kanako." Amen!

<sup>121</sup> Karon timan-i, karon, atong makita si Melquisedec ug ngano nga si Maria dili Niya inahan. Mao kanay hinungdan nga Iyang gitawag siya nga "babaye," dili *nanay*. "Siya walay amahan," tungod kay Siya mao ang Amahan, ang Amahan nga walay kinutuban, ang tulo diha sa Usa. "Siya walay inahan," wala gayud. Siya walay amahan, tungod kay Siya ang Amahan. Sama sa giingon sa magbabalak usa ka higayon, nagahisgot ug usa ka pagdayeg ngadto kang Jesus, matud niya:

AKO MAO kadtong nakigsulti kang Moises sa  
usa ka sapinit nga nagdilaab sa kalayo,

AKO MAO ang Dios ni Abraham, ang Mahayag  
ug Bitoon sa Kabuntagon.

AKO MAO ang Alfa, Omega, ang sinugdan  
gikan sa katapusan.

AKO MAO ang tibuuk kabuhatan, ug si Jesus  
maoy Ngalan.

(Husto kana.)

Oh, kinsa man kuno Ako, ug unsa man ang  
ilang igasulti diin Ako gikan,

Nailhan ba ninyo ang Akong Amahan, o  
makatug-an ba kamo sa Iyang Ngalan?  
(Aleluya!)

<sup>122</sup> Mao kanay Ngalan sa Amahan! Oo, "Mianhi Ako sa Ngalan sa Akong Amahan, ug wala ninyo Ako dawata." Kita n'yo? Mao gayud, Siya mao sa gihapon kagahapon, karon, ug hangtud sa kahangturan.

<sup>123</sup> Ug kining si Melquisedec nahimong unod. Gipadayag Niya ang Iyang Kaugalingon ingon nga Anak sa tawo sa Iyang pag-anhi, ingon nga usa ka Propeta. Mianhi Siya sa tulo ka mga

ngalan sa pagka-Anak; ang Anak sa tawo, ang Anak sa Dios, ang Anak ni David.

<sup>124</sup> Sa dinhi pa Siya sa yuta, Siya usa ka Tawo, aron pagtuman sa Kasulatan. Si Moises nag-ingon, “Ang Ginoo nga inyong Dios magpatindog ug usa ka Propeta sama kanako.” Busa Siya kinahanglan nga moanhi ingon nga usa ka Propeta. Siya wala, wala gayud miingon, “Ako mao ang Anak sa Dios.” Siya miingon, “Ako mao ang Anak sa tawo. Nagatoo ba kamo sa Anak sa tawo?” Tungod kay, mao kana dapat kon unsa ang Iyang panghimatuod, tungod kay mao man kana kon unsa Siya.

Karon Siya mianhi sa usa pa ka Ngalan sa pagkaanak, Anak sa Dios; ang dili makita, ang Espiritu.

Ug sa dihang Siya mobalik pag-usab, Siya Anak na ni David, aron molingkod sa ibabaw sa Iyang trono.

<sup>125</sup> Karon sa dihang dinhi pa Siya ug nahimong unod, gitawag Siya, “ang Anak sa tawo.” Karon, giunsa man Niya ang pagpaila sa Iyang Kaugalingon ngadto sa kalibutan ingon nga Anak sa tawo, Propeta?

<sup>126</sup> Usa ka adlaw nagsugilon ako ug usa ka sugilanon bahin kang Pedro ug Andres, nga iyang igsoon. Mangingisda sila, ug ang ilang amahan nga si Jonas usa ka dakung karaang magtotoo. Usa naina ka adlaw sila miingon samtang naglingkod siya sa pikas bahin sa sakayan. Siya miingon, “Mga anak, nahibalo kamo kong giunsa ta ang pag-ampo kong magkinahanglan ta’g isda.” Sila namaligya nga mangingisda. Siya miingon, “Nagsalig ta sa Dios, ang Jehova, alang sa atong panginabuhi. Ug karon nagkatiguwang na ako; dili na ako makadugay’g uban kaninyo mga anak. Ug ako kaniadto pa, maingon nga tinuod nga mga magtotoo, nagpaabot sa panahon sa diha ang Mesiyas moabut na. Nagkaaduna na tay tanang matang nga mga mini, apan adunay usang moabot nga maoy Bugtong tinuud, sa umalabot nga adlaw.” Ug miingon siya, “Sa dihang moabut na kining maong Mesiyas, dili ko buut mga anak nga malimbungan kamo. Kining maong Mesiyas dili ingon sa usa lamang ka teyologo. Siya usa ka Propeta, kay ang atong propeta nga si Moises, kang kinsa nagsunod kita, siya nag-ingon.”

Karon, ang bisan kinsang Judio magatoo gayud sa iyang propeta. Siya natudloan aron masayran kana. Ug kon ang propeta nagaingon ug bisan unsa nga mao na, nan kana mao ang kamatuoran. Apan ang Dios nag-ingon, “Kong aduna man usa sa taliwala kaninyo, nga espirituhanon, o usa ka propeta, Ako ang Ginoo maoy magpaila sa Akong Kaugalingon diha kaniya. Ug kong unsay iyang ginaingon nagakatuman, nan patalinghugi siya ug kahadloki siya; apan kon kini dili, nan ayaw gayud siya’g kahadloki.” Kita n’yo? Busa mao kana ang—ang kapanghimatuoran sa propeta.

<sup>127</sup> “Busa si Moises gayud usa ka gipanghimatud-ang propeta, ug siya miingon, ‘Ang Ginoo nga inyong Dios magpatindog, sa inyong taliwala, gikan sa inyong mga kaigsoonan, usa ka Propeta sama kanako. Ug ang tanan nga dili magpatalinghog kaniya pagaputlon gikan sa katawhan.’” Siya miingon, “Karon, mga anak, hinumdumi, nga, ingon nga mga Hebreohanon, kita nagatoo sa mga gipanghimatud-an nga propeta sa Dios.”

Karon paminawi pag-ayo. Ayaw’g pakyasa kini. Ug siya miingon, “Kong moabut na ang Mesiya, mailhan ninyo Siya, tungod kay Siya usa ka Propetang-Mesiya. Karon, sila miingon nga kap-atan na ka gatus ka katuigan ang milabay. Wala nay atong propeta sukad pa kang Malaquias, apan siya magaabot!”

<sup>128</sup> Usa niana ka adlaw, human sa iyang kamatayon, pipila ka tuig, ang iyang anak nga si Andres nagsuroysuroy didto sa pangpang. Ug iyang nadungog ang usa ka tawong luug gikan sa kamingawan, nga nagaingon, “Kanang Mesiya nagatindog na karon sa inyong taliwala!” Kadtong dakong agila nga nagdako sa kamingawan ug nga milupad sa ibabaw didto, miingon, “Ang Mesiya anaa na sa inyong taliwala karon. Wala pa kita makaila kaniya, apan Siya nagatindog na sa taliwala kaninyo. Ako Siyang mailhan, tungod akong makita ang ilhanan nga nagakunsad gikan sa Langit.”

Usa ka adlaw siya miingon, “Anaa na, tan-awa, ang Cordero sa Dios nga magakuha sa sala sa kalibutan!”

Palayo milakaw ang...milakaw kining tawhana, aron pangitaon ang iyang igsoong lalaki. Siya miingon, “Simon, buut ko nga moari ka dinhi; amo nang nakita ang Mesiya.”

“Oh, sige lang, Andres! Mas nahibalo ka naman niana!”

“Oh, nahibalo ako. Apan, kadtong, kining Tawhana lahi.”

“Hain man Siya? Diin man Siya nagagikan?”

“Si Jesus nga taga Nazaret.”

“Kanang gamay’ng, mangil-ad nga dakbayan? Ah, dili Siya mahimong magagikan sa usa ka dautan, mahugaw’ng dapit sama niana.”

“Umari ka lang ug tan-awa.”

<sup>129</sup> Sa katapusan iyang nadani siya sa pagkuyog usa niana ka adlaw. Busa sa iyang paghiabot sa atubangan niining Mesiya, si Jesus nga nagatindog didto, nga nagkigsulti sa katawhan. Sa dihang siya mipaduol sa Iyang atubangan, Siya miingon, “Ang imong ngalan si Simon, ug ikaw anak ni Jonas.” Mao kana ang nakaingon niini. Iyang nabatonan ang mga yawe sa Gingharian. Ngano man? Siya nasayod nga kanang Tawhana wala makaila kaniya. Ug giunsa man Niya sa pag-ila kaniya, ug kadtong diosnong tiguwang nga amahan nga maoy nagtudlo kaniya kong unsaon ang pagtoo sa Mesiya?

<sup>130</sup> Dihay usa ka tawo nga nagatindog didto, nga ginganlag Felipe. Oh, hilabihan ang iyang kadasig! Adunay laing tawo nga iyang kaila, nga kaniadto pa nagatoon sa Biblia. Palayo siya miadto, libot sa bungtod, ug iyang hingkaplagan siya didto sa iyang kaolivahan. Siya kaniadto nagaluhod, naga-ampo. Magkauban sila nga daghang gitun-an sa Biblia, busa miabot siya didto. Ug miingon siya, human nga siya human na sa pag-ampo, matud niya, “Ari ka, tan-awa kon Kinsa kining among nakita; si Jesus nga taga Nazaret, ang anak ni Jose. Siya mao ang Mesiyas nga atong ginapaabot.”

Karon akong madungog si Natanael nga nagaingon, “Karon, Felipe, wala ka kaha nalapas na, wala ba?”

<sup>131</sup> “Oh, dili. Wala. Karon suginlan ta ka. Nasayod ka, kauban ta kaniadto pa sa pagtoon sa Biblia, ug unsay giingon sa propeta mahitungud sa Mesiyas?”

“Siya usa ka Propeta.”

“Nahinumdum ka ba niadtong tiguwang nga mangingisda nga imong gipalitan ug isda, nga walay igong hingkat’onan sa pagsulat sa iyang ngalan, nga gitawag ug Simon?”

“Oo. Uh-huh.”

<sup>132</sup> “Siya mipaduol. Ug nasayod ka ba kong unsa? Kining si Jesus nga taga Nazaret gitug-an kaniya nga ang iyang ngalan mao si Simon, giilisan ang iyang ngalan ug Pedro, nga mao’g ‘gamay’ng bato’ ug gitug-an kaniya kong kinsa ang iyang amahan.”

“Bueno,” matud niya—matud niya, “Wala ko kahibalo. Aduna bay maayong butang nga nagagikan sa Nazaret?”

<sup>133</sup> Siya miingon, “Dili na ta maghisgot mahitungud niini; dali lang ug tan-awa.” Kana usa ka maayong hunahuna, “Dali ug tan-awa.”

Busa ania na si Felipe, nga nagadala kang Natanael. Ug sa diha nga siya nahiduol na, si Jesus tingali’g nagatindog, nagapamulong, tingali’g nagaampo sa masakiton diha sa laray sa mga alampoan. Ug sa pag-abot niya diin didto si Jesus, gitawag siya ni Jesus, ug miingon, “Tan-awa ang usa ka Israelinhon kang kinsa wala ang pagkalimbongan.”

<sup>134</sup> Karon, moingon kamo, “Bueno, sa matang kato sa iyang pagpamisti.” Oh, dili. Ang tanan mga taga sidlakan managsama ra ug binistihan. Tingalig taga Siria kato siya, o bisan unsa man kato; sa bungot, sa sinina.

<sup>135</sup> Siya miingon, “Tan-awa ang usa ka Israelinhon kang kinsa wala ang pagkalimbongan,” sa laing paagi, “usa ka ligdong, tawong matinud-anon.”

Bueno, kana morag nakapakipus kang Natanael. Ug miingon siya, “Rabi,” nga nagkahulogan, “magtutudlo.” “Rabi, kanus-a

Mo man ako hiilhi? Giunsa Mo man pagkahibalo nga ako Judio? Giunsa Mo man ang pagkahibalo nga ako maligdong, walay pagkalimbongan?”

<sup>136</sup> Siya miingon, “Sa wala ka pa tawga ni Felipe, sa didto ka pa sa ilalum sa kahoy, nakita Ko na ikaw.” Uh! Napulog lima ka milyas ang gilay-on, nga laing tampi sa lungsod, sa miaging adlaw.

Unsay iyang giingon? “Rabi, Ikaw mao ang Anak sa Dios. Ikaw mao ang Hari sa Israel!”

<sup>137</sup> Apan adunay nagatindog didto nga mga pari, nagpakaingon, pinatikig ang kaugalingon, miingon, “Kining tawhana mao si Beelzebub, usa ka manghihimad.”

Si Jesus miingon, “Pasayloon Ko kamo niana.”

<sup>138</sup> Karon, hinumdumi, wala nila kini gisulti sa kusog, kondili gisulti nila kini diha sa ilang mga kasingkasing. “Ug Iyang nasabot ang ilang mga hunahuna.” Husto kana. Mao kana kon unsa ang ginaingon sa Biblia. Tawga kini ug *telepatiya* kong maoy gusto ninyo, apan Iyang—Iyang nasabot ang ilang mga hunahuna.

<sup>139</sup> Ug Siya miingon, “Ginapasaylo Ko kamo niana. Apan sa umalabot ang Espiritu Santo moabut ug magbuhat sa samang butang,” human sa Iyang pagbiya; “ang pagsulti’g usa ka pulong batok Niini, dili na gayud mapasaylo niining panahona o sa kapanahonan nga palaabuton.” Husto ba kana? [Ang kongregasyon nagaingon, “Amen.”—Ed.] Karon, kato ang mga Judio.

Unya usa niana ka adlaw gikinahanglan Niya nga moadto sa Samaria. Apan sa dili pa nato padayonon kana, atong nakita ang babaye, o ang . . .

<sup>140</sup> Ang lalaki, samtang miagi siya sa pultahan nga ginganla’g Matahum, nga siya naayo. Ug si Jesus nahibalo sa iyang kahintang, ug giingnan siya, “Dad-a ang imong higdaanan ug pauli.” Ug iyang gibuhat kini, ug naayo.

Unya atong nasayran, ang mga Judio, ang uban kanila midawat Kaniya. Ang uban mitoo niini; ang uban wala. Nganong dili man sila mitoo niini? Dili sila gikatagana nang daan alang sa Kinabuhi. Dili sila kaniadto kabahin nianang kinaiyahan.

<sup>141</sup> Karon hinumdumi, sila kaniadto mga pari ug mga inilang tawo. Ug si Jesus . . . Pamalandunga kadtong mga teyologo ug mga pari, mga tawo nga dili ka makakaplag ug ikasaway sa ilang kinabuhi. Si Jesus miingon, “Kamo gikan sa inyong amahan nga mao ang yawa, ug iyang mga buhat mao ang inyong ginabuhat.” Matud pa, “Kong kamo gikan pa sa Dios, kamo motuo Kanako. Kong dili kamo makatoo Kanako, toohi ang—toohi ang mga buhat nga Akong ginabuhat; sila maoy nagapanghimatuod kong Kinsa Ako.”



<sup>142</sup> Karon, ang Biblia nag-ingon, nga, “Si Jesus mao sa gihapon kagahapon, karon, ug hangtud sa kahangturan.” Si Jesus miingon, “Ang mga buhat nga Akong ginabuhar buhaton usab kaniya nga nagatoo Kanako.” Husto kana? Matikdi, mao kana ang matuod nga Melquisedec karon.

<sup>143</sup> Karon timan-i, pag-usab, adunay tulo lamang ka kaliwatan sa tawo.

Inyo nang nadungog ako nga nagaingon nga ako usa ka tigpalain. Mao ako. Ang tanang mga Cristohanon mga tigpalain; dili ang pagpalahi sa bulok, kondili pagpalahi sa espiritu. Ang bulok sa tawo sa iyang panit walay labot niini kaniya. Siya usa ka anak sa Dios pinaagi sa Pagpakatawo. Apan ang usa ka Cristohanon, ang Dios nag-ingon, “Ilain Ako!” “Panggula kamo gikan kanila,” ug uban pa. Siya usa ka tigpalain, mahitungod sa kahugawan, tali sa husto ug sayup.

<sup>144</sup> Apan timan-i, anaay ilang panagkabulag kaniadto, panagkabulag sa kaliwatan, nga mao ang mga Samarianhon.

Ug adunay tulo lamang ka mga kaliwatan sa katawhan sa yuta; kong kita nagatoo sa Biblia; mao kanang, kang Ham, Sem, ug kang Japhet nga katawhan. Mao kana ang tulo ka mga anak ni Noe. Kitang tanan naggikan diha. Husto kana. Mao kana ang nagahimo kanatong tanan nga naggikan kang Adan, nga maoy nagahimo kanatong tanan nga manag-soon. Ang Biblia nag-ingon, “Pinaagi sa usa ka dugo gibuhar sa Dios ang tanang nasud.” Kitang tanan managsoon, pinasubay sa dugo. Ang usa ka tawong itum makahimo paghatag ug dugo sa tawong puti, o bali’bali. Ang tawong puti makahimo paghatag sa—sa Hapon, sa tawong dalag, o sa Indian, sa tawong pulahon, o unsa pa, o sa usa ka kaliwat ni Japhet, o bisan unsa pa, makahimo siya paghatag kaniya sa dugo, tungod kay kitang tanan managsama ra ug dugo. Ang bulok sa atong panit, kon diin man kita nagpuyo, walay labot kini.

Apan sa diha nga kita ginalain, mao diha kita nagagawas sa kalibutan, sama nga Iyang gipagula ang Israel gikan sa Egipto. Mao kana sa diha kita gilain gikan sa mga butang sa kalibutan.

<sup>145</sup> Karon, sila kaniadto mga katawhan ni Ham, Shem, ug Japhet. Ug kon may panahon pa kita aron balikan ang mga kagikanan, inyong makita ang Anglo-Saxon, kong diin siya gikan. Karon, mao kadto ang Judio. . . Ang Samarianhon, nga katunga sa Judio ug Gentil, nga nakigminyo sa Gentil diha sa mga buhat ni Balaam, ug Moab. Mga Samarianhon sila. Ug mao kana ang mga Judio ug mga Gentil.

Karon, kitang mga Anglo-Saxon walay labot sa bisan unsa niini. Kita kaniadto wala nagtoo bisan unsa nga Mesiya, ni bisan unsa. Wala kita kaniadto nagapaabot alang sa usa. Gipasulod ta sa ulahi na.

Si Jesus mianhi sa Iyang kaugalingong katawhan, ug sila wala modawat Kaniya. Ug miingon Siya ngadto sa Iyang mga tinun-an, “Ayaw kamo pangadto sa agianan sa mga Gentil, kondili pangadto hinoon sa mga nangawalang carnero sa Israel.” Ug miadto lamang Siya sa nangawalang carnero sa Israel. Ug bantayi, Iyang gipadayag ang Iyang Kaugalingon ingon nga Anak sa tawo, sa atubangan sa mga Judio. Ilang gisalikway Kini.

Karon, ang Samarianhon, ingon nga mestisong Judio ug Gentil, sila usab mitoo, ug nanagpaabot sa Mesiya.

Kita kaniadto dili niana. Mga pagano pa kita kaniadto, nga may mga bunal pa diha sa atong likod, nagasimba sa mga diosdios; ang Gentil.

<sup>146</sup> Apan karon usa niana ka adlaw, San Juan 4, Iyang gikinahanglan nga moagi sa Samaria, diha sa Iyang pag-adto sa Jericho. Apan mitungas hinoon sa Samaria. Ug samtang Siya nagatungas didto, Siya milingkod sa atabay gawas sa siyudad nga ginganla’g Sicar. Ug ang atabay, kong kamo nakaadto na didto, kini morag matahum tan-awon sama niining ania dinhi. Ug didto anaay tubod alang sa tanan, nga tubig, diin silang tanan nagaadto. Ug ang kababayen-an nagaadto sa buntag, dala ang ilang mga kulon sa tubig, ug lukduhon kini nila sa ilang ulo, ug usa niini sa matag bat’ang, ug nagalakaw sa tul-id gayud nga dala kini, dili gayud mo-tikba; nakigsulti pa sa usa’g usa. Busa, sila moadto, ang mga tawo moadto didto.

<sup>147</sup> Busa kini hapit na kaniadto mag alas onse ang takna sa buntag. Busa Iyang gipalakaw ang Iyang mga tinun-an ngadto sa siyudad, aron pagpamalit ug makaon, pagkaon. Ug samtang wala pa sila . . .

<sup>148</sup> Dihay usa ka babaye nga mahugaw’g dungog. Atong ginatawag siya, karon, usa ka babayeng sa suga nga pula, o bigaon. Daghan kaayo siya’g mga bana. Busa samtang nagalingkod si Jesus didto, kining maong babaye nagatungha sa hapit na ang alas onse ang takna. Tan-awa, dili siya makahimo sa pag-adto kauban sa mga ulay sa dihing sila nagagawas aron pagtimba sa tubig panglaba sa buntag; kinahanglan niya nga maghulat hangtud nga silang tanan . . . Dili sila magsagol sama sa ilang ginabuhay karon. Gitiman-an na siya. Busa niadto, siya nagagawas aron pagkuha ug tubig, busa iyang gikuha ang daang timba, ug gibutang ang mga kaw-it sa ibabaw sa timba, ug gisugdan na kini ipaubos.

Iyang nadungog ang usa ka Tawo nga nagaingon, “Babaye, tagai Ko ug mainum.” Karon, hinumdumi, kini mao si Melquisedec. Kini mao si Jesus, kagahapon, ang Anak sa tawo.

<sup>149</sup> Ug milingi siya, ug iyang nakita ang usa ka Judio. Busa siya miingon, “Sir, dili maayo sa usa ka Judio ang pagpangayo sa usa ka Samarianhon sa bisan unsang butang. Ako usa ka babayeng taga Samaria, busa nakalapas Ka sa Imong lugar. Dili ka unta

angay nga mangayo kanako sa ingon nianang butanga. Walay atong panagdait sa usa'g usa.”

<sup>150</sup> Siya miingon, “Apan kong nasayod ka pa kong Kinsay nagapakigsulti kanimo, mangayo ka gayud Kanako ug mainum.”

Siya miingon, “Unsaon Mo man sa pagkuha niini? Halawum ang atabay, ug walay Imong magamit sa pagkuha.”

<sup>151</sup> Miingon Siya, “Ang tubig nga Akong ginahatag mao ang Tubig sa Kinabuhi, nga magdagayday ngadto sa Kinabuhing Dayon.”

Nakigsulti Siya kaniya hangtud nga Iyang nasayran kong unsa kaniadto iyang kahintang. Ug dayon mao . . . Bantayi kong unsay Iyang giingon kaniya karon, “Lakaw ug kuhaa ang imong bana ug balik dinhi.”

Ug miingon siya, “Wala akoy bana.”

<sup>152</sup> Miingon Siya, “Nagsulti ka sa tinuod, tungod kay aduna nay imong lima, ug ang usa nga karon imong gikaipon dili imong bana. Busa, sa niini, nagsulti ka sa tinuod.”

Bantayi ang kalainan tali nianang babaye ug nianang panon sa mga kaparian. Labaw pang nahibalo siya bahin sa Dios kay nianang tanan nga nahibaloan sa mga pari, tipukon pa.

<sup>153</sup> Siya miingon, “Sir, akong naila nga Ikaw usa ka Propeta.” Siya miingon, “Sulod sa kap-atan ka gatus ka tuig walay among usa. Karon, nasayod kami nga ang Mesiyas umaabut. Ug kong moabut na ang Mesiyas, mao kana ang Iyang pagabuhaton.” Mao kana ang ilhanan sa Mesiyas, tungod kay Siya mao ang Anak sa tawo. Miingon, “Mao kana kon unsa ang Iyang pagabuhaton kong moabut na Siya. Ikaw na gayud ang Iyang propeta.”

<sup>154</sup> Miingon Siya, “Ako mao Siya.” Walay si bisan kinsa makasulti niana.

<sup>155</sup> Iyang gibutang kadtong banga ug midalagan ngadto sa siyudad, ug miingon, “Umari kamo, tan-awa ang usa ka Lalaki Kinsa mitug-an kanako kong unsay akong nabuhat. Dili ba kini ang Mesiyas mismo?”

Karon hinumdumi, Iyang gisaad nga buhaton ang sama nianang butanga sa katapusan sa kaliwatan sa Gentil.

Ang mga Judio adunay upat ka libo ka tuig aron sa pagpaabot nianang Mesiyas, upat ka libo ka tuig sa pagpanudlo nga Siya moabut, ug kon unsay Iyang buhaton sa dihang Siya moabot na didto, ug napakyas sila nga makita Siya, o napakyas sa pag-ila niini. Ug sa Iyang gipaila na ang Iyang Kaugalingon diha sa pinaka Biblikanhong pinulongan nga Iyang giingon nga Iyang buhaton, sa dihang didto pa Siya sa theophany ug dayon nahimong unod ug mipuyo uban kanila, napakyas sila nga

makita kini, ug gitawag ang Iyang mga buhat nga mga buhat sa yawa.

<sup>156</sup> Karon aduna nay atong duha ka libo ka tuig sa pagpanudlo, padulong ngadto sa iglesia Katoliko Romano, pagkahuman sa mga apostoles. Ug dayon miagi ta sa Romano Katoliko, sa Griego, ug uban pa, paadto na sa panahon ni Luther, ug Wesley, sa unsa pa, siyam ka gatus ka nagakalainlaing mga pundok nga nangabot. Atua na kanilang tanan kining mga kapanahonan, sa pagpanudlo.

Karon Siya nagsaad, sa dili pa moabut ang katapusang panahon, nga ang hulagway sa Sodoma ug Gomorra mobalik, “Maingon sa mga adlaw sa Sodoma, maingon usab niini ang pag-abot sa katapusang panahon, ang Anak sa tawo magapadayag sa Iyang Kaugalingon pag-usab.” (Walay sulud diha sa type—Ed.)

“Hamubo na lang ang panahon ug ang kalibutan dili na makakita Kanako; apan kamo makakita Kanako, tungod kay Ako,” usa ka personal nga pulingalan, “Ako maga uban kaninyo, sulod ninyo, hangtud sa pagtibawas, sa katapusan sa kalibutan. Ako magauban kaninyo.” Siya mao sa gihapon kagahapon, karon, ug hangtud sa kahangturan. Nakita ninyo?

<sup>157</sup> Nakita ninyo, ang *Samaritanhon* mao, sa tinud-anay, sumala sa akong wali sa miaging gabii, mao si Hagar, tan-awa, usa ka binalit-ad nga tipo. Ang *Judio* mao si Sara, o Sarahanon. Apan ang *Gentil* gikan kang Maria, ang Harianong Kaliwat, ang Harianong Kaliwat ni Abraham.

<sup>158</sup> Karon gisaad kini nga sa ulahing mga adlaw, nga, kining mao ra nga Dios, kining mao ra nga Cristo, mobalik dinhi ug magpadayag sa Iyang Kaugalingon ingon nga Anak sa tawo.

Ngano man? Siya mao sa gihapon kagahapon, karon, ug hangtud sa kahangturan. Ug kong Iyang natugotan kadtong mga Judio nga matudloan, ug hatagan sila niadtong ilhanan sa pagka Mesiyas, ug unya moabot sa kaulahiag pagtulon-an sa Gentil ug pasagdan lang sila nga monunot diha sa teolohiya, mahimo Siyang dili matarung. Kinahanglan buhaton Niya ang managsamang butang, tungod kay ang Biblia nag-ingon, diha sa . . . Mga Hebreohanon 13:8, “Siya mao sa gihapon.”

Ug Iyang nasaad sa Malaquias 4, ug sa tanan pang ubang mga Kasulatan, nga, sa katapusang mga adlaw, ang iglesia mapahimutang sa tukma gayud nga sama niini karon, ug ang kalibutan maingon usab niini.

<sup>159</sup> Tan-awa ang kalibutan karon. Tan-awa ang Sodomanhong kahintang. Tan-awa ang mga linog sa nagkalain-laing mga dapit, ug ang mga butang nga nagakahitabo. Tan-awa ang iglesia ug ang kaguliyang niini, nga Babilonianhon. Tan-awa ang mensahero ngadto niini, usa ka Oral Roberts ug usa ka Billy Graham.

G-r-a-h-a-m, unang higayon nga adunay atong mensahero, sa tanang ka-iglesiahian, nga ang iyang ngalan nagatapus sa h-a-m, sama ni Abraham. Ang A-b-r-a-h-a-m pito ka mga litra. Ang G-r-a-h-a-m unom ka mga litra. Hain man siya karon? Ngadto sa kalibutan. Ang unom maoy numero sa tawo. Ang tawo gibuhat sa ika-unom ka adlaw. Apan ang pito maoy numero sa Dios.

<sup>160</sup> Karon tan-awa sila didto sa Sodoma. Ug didto ang ilang mga mensahero nagawali kanila.

Apan dayon hain naman nianang harianong Kaliwat ni Abraham? Hain man ang ilang ilhanan, nga Iyang giingon? “Maingon sa mga adlaw sa Sodoma,” nga ang Dios mikanaug ug napadayag diha sa tawhanong unod, ug misulti kong unsay gihunahuna ni Sara diha sa iyang kasingkasing, sa tolda sa luyo Niya, ang katapusang ilhanan sa wala pa ang kalibutan sa Gentil gilaglag pinaagi’g kalayo. Ug nabatonan na sa Iglesia ang iyang katapusang ilhanan sa dili pa ang tibukok kalibutan pagalaglagon, kining gingharian sa Gentil pagalaglagon pinaagi’g kalayo ug kapungot sa Dios. Nagatoo ba kamo niana? [Ang kongregasyon nagaingon, “Amen.”—Ed.]

<sup>161</sup> Kanang si Melquisedec kaniadto unod, nagpahayag sa Iyang Kaugalingon diha sa tawhanong lawas; ug unya nahimo Siyang unod. Ug karon, niining gabhiona, Siya mao sa gihapon, kagahapon, karon, ug hangtud sa kahangturan. Nagatoo ba kamo niini? [Ang kongregasyon nagaingon, “Amen.”—Ed.]

<sup>162</sup> Kinsa kining si Melquisedec, kaniadto, mao kanang mao sa gihapon kagahapon, karon. . . “Wala gayud amahan, wala gayud inahan; Siya wala gayo’y sinugdanan sa mga adlaw, Siya wala gayo’y katapusan sa kinabuhi.” Ug misugat Siya kang Abraham, ug unsang matang sa ilhanan ang Iyang gibuhat? Unya sa pagkahimo Niyang unod, Siya miingon nga kini mahitabo pag-usab sa dili pa ang katapusang panahon. Nagatoo ba kamo niana? [Ang kongregasyon nagaingon, “Amen.”—Ed.] Nagatoo ako niini. (“Amen.”)

Mag-ampo ta.

<sup>163</sup> Minahal nga Dios, ako nagatoo sa mga Kasulatan, nga Ikaw nag-ingon na nga Ikaw mao “sa gihapon kagahapon, karon, ug hangtud sa kahangturan.” Ug ingon nga matinud-anon sa akong kasingkasing, Ginoo, ako nahibalo nga adunay butang nga magakahitabo. Dili ko kaayo kini masigurado. Nahadlok ako sa pagsulti ug bisan unsang butang, Ginoo. Nahibalo Ka sa kasingkasing sa Imong alagad.

<sup>164</sup> Ug pila ka mga higayon, tadlas ngadto sa kapanahonan sa dihang mipadala Ka ug mga butang, ang katawhan mapakyas sa pagkakita niini. Ang tawo sa kanunay nagadayeg sa Dios tungud sa Iyang gibuhat, ug nagapamulong kong unsay mga dagkong butang nga Iyang pagabuhaton, apan ginasalikway kong unsay Iyang ginabuhat. Busa mao pud kini tadlas sa panahon. Nganong

napakyas man ang iglesiang Romano sa pagtan-aw kang San Patrick ingon nga propeta sa Dios? Nganong ilang gipatay si Joan of Arc sa diha siya man usa—usa ka babayeng propeta, gisunog siya ingon nga usa ka abat? Amahan, kini kanunay ang nangagi na. Imong ginalilong kini gikan sa mga mata sa mga makinaadmanon ug masinabuton. Dili ikahibulong nga miingon Ka niadtong mga pari, “Inyong ginadayandayanan ang mga pantiyon sa mga propeta, ug kamo maoy nagbutang kanila diha.” Human nga nawala na sila, ilang nakita ang ilang sayup. Kanunay Ka nila ginalutos, Ginoo, sa bisan unsang porma nga Ikaw nagaanhi.

<sup>165</sup> Naga-ampo ako, niining gabhiona, Dios, sa usa na lang ka higayon. Ugma kami nahitala sa . . . sa pag-adto sa Tucson. Sa laing mga bahin sa kalibutan, laing mga siyudad nga diin kami kinahanglan magwali. Apan, Minahal nga Dios, aniyay tingali’g mga dumuloong dinhi niining gabhiona nga wala pa . . . Sila nakadungog na sa mga Pulong nga nawali, apan wala pa gayud nakakita Niini nga gipadayag.

Maingon na sa akong gipangayo Kanimo sa sinugdan. Sa dihang kadtong mga tinun-an, si Cleopas ug ang iyang higala, nga nagagikan sa Emmaus, nagalakaw sa dalan, ug mitungha Ka gikan sa kasagbutan ug misugod sa pagpakigsulti kanila, human sa pagkabanhaw, nga miwali kanila. Ah, miingon Siya, “Mga buangbuang, hinay sa kasingkasing. Wala ba kamo masayud nga ang Cristo maga-antos gayud niining mga butanga, dayon magasulod ngadto sa Iyang himaya?” Apan sa gihapon wala gayud nila nailhan kini. Tibuok adlaw nakiglakaw sila uban Kanimo, ug sa gihapon wala makaila kanimo. Apan usa niana ka gabii . . .

Miabot ang gabii, ila Kang gihawiran aron mosulod. Sa dihang misulod sila sa gamay’ng lawak ug gisirhan ang mga pultahan, dayon Ikaw nagbuhat ug butang nga sama gayud sa paagi nga Imong gibuhat kini sa wala pa ang paglansang Kanimo, ug ilang naila kini nga mao kadto ang nabanhaw nga Cristo. Sulod sa hamubong mga higayon diha Ka na sa luyo sa mga tabil ug nawala. Nga nagadali sila nagpanagan ug gisuginlan ang mga tinun-an, “Ang Ginoo tinuod nga nabanhaw gayud!”

<sup>166</sup> Amahan, Dios, ako nagatoo nga buhi Ka sa gihapon. Nahibalo ako nga Ikaw buhi gayud. Ug napamatud-an Mo na kini kanamo sa daghang higayon. Mahimo Mo ba nga buhaton kini sa makausa pa kanamo, Ginoo? Kong nakakaplag kami ug kahimuot sa Imong panan-aw, itugot kini nga mahitabo sa makausa pa. Akoy Imong alagad; kini sila Imong mga alagad dinhi. Ginoo, ang tanan nga akong giingon dili mohitupong sa . . . Usa lamang ka pulong gikan Kanimo mohimong mas labaw pa kaysa sa akong mga naingon na sa niining lima na ka mga gabii, o lima ka mga mensahe. Mas molabaw Kini, usa lang

ka pulong gikan Kanimo. Dili Ka ba makigsulti, Ginoo, aron ang mga tawo mahibalo nga nasultihan ko sila sa Kamatuoran? Itugot kini, Dios. Ako kining ginapangayo sa Ngalan ni Jesus, kini sa makausa pa. Amen.

<sup>167</sup> Karon, wala ako makaila kaninyo. May nailhan akong pipila ka mga tawo. Nakaila ko niining batan-ong lalaki nga nagalingkod *dinhi*. Nakaila ako kang Bill Dauch nga nagalingkod *diha*. Buut ko. . .Ania si Igsoong Blair, si Rodney Cox. Lisod makita didto sa layo.

*Niining* kilira, sa pagka karon walay akong nakitang usa, sa tinud-anay, nga akong kaila.

<sup>168</sup> Karon pila man ang nia dinhi nga nahibalo nga ako dili ninyo kaila? Iisa ang inyong mga kamot, nakahibalo nga walay akong nahibaloan bahin kaninyo, iisa ang inyong mga kamot sa pikas ug pikas.

Pila ang ania dinhi nga adunay suliran, o butang nga inyong nasayran nga wala ako'y kasayoran? Mahimo iisa ang inyong mga kamot.

Karon, mahimo kining bug-os, sigurado kaayong bug-os nga imposible alang kanako ang pagkasayod ug bisan unsang butang bahin kaninyo. Gawas lang, unya, nga kini gayud mogikan sa pinadayag sa Espiritu.

Ug ingon nga nasulti ko na kaninyo sa tanan kining mga gabii, ug karong gabii, nga Siya dili patay; Siya ania dinhi, ug nagsaad nga buhaton ang samang butang. Ug nagsaad nga moabut ang usa ka panahon sa katapusang mga adlaw, sumala sa Malaquias 4 ug sumala sa San Lucas, nga Siya mopakita pag-usab sa tawhanong porma diha sa taliwala sa Iyang mga katawhan ug magbuhat ug samang mga butang, ug magpadayag ug samang butang, mao ra nga ilhanan sa Mesiyas. Pila ang nakahibalo niana, kamong nagabasa sa Biblia, nasayod nga kana mao ang Kamatuoran? Moingon, "Amen." [Ang kongregasyon nagaingon, "Amen."—Ed.] Ang tanan nga magbabasa gayud sa Biblia.

<sup>169</sup> Karon, nasayod ako nga langyaw kini alang sa mga tawo karon, apan sa gihapon kini ang Kamatuoran. Mao kana ang hinungdan nga wala nila maila si Jesus nga taga Nazaret. Nakaila sila sa ilang mga kredo sa simbahan, apan wala sila makaila Kaniya. Apan Siya miabot sumala gayud sa giingon sa Biblia; dili usa ka teyologo, dili usa ka pari. Siya mianhi nga usa ka Propeta, ug ang Iyang katawhan wala modawat Kaniya.

<sup>170</sup> Karon, kong ang Dios motuman sa Iyang Pulong, ug kong nahitabo man nga ako. . .kini mahitabo nga mopaingon diha kaniya nga akong kaila, sa ingon mokuha ako—ako ug laing uban. Kita n'yo, gusto ko kanang wala nako hiilhi. Ug gusto ko nga mag-ampo kamo.

<sup>171</sup> Karon, bantayi, usa ka panahon kaniadto anaay usa ka babaye nga adunay sakit. Nagasto na niya ang iyang salapi ngadto sa mga doktor; wala sila’y nahimong maayo kaniya. Ug siya miingon diha sa iyang kasingkasing, “Kong mahikap ko lang ang bisti nianang Tawhana, mamaayo gayud ako.” Nahinumdum ba kamo sa sugilanon? Ug sa ingon ang tanan kanila naninguha sa pagpugong kaniya sa pagpabilin sa likod, apan midutdot siya hangtud sa nahikap niya ang Iyang bisti, dayon mibalik ug milingkod.

<sup>172</sup> Karon paminaw ug maayo. Ug dayon sa diha Iya nang nabuhat kana, sa diha iya nang nabuhat kana, milingi si Jesus ug miingon, “Kinsay mihikap Kanako?”

<sup>173</sup> Aba, si Pedro nga apostol gibadlong Siya. Tingali’g naingon niya ang sama niini, “Ginoo, ayaw pagsulti’g ingon niana. Ang mga tawo magtoo nga adunay dili maayo Kanimo. Tungud kay, sa dihang Ikaw nag-ingon kanila nga mokaon sa Imong unod ug moinum sa Imong Dugo, naghunahuna na sila nga anaay dili na maayo. Ug moingon Ka, ‘Kinsay mihikap Kanako?’ Aba, ang tibuok katawhan nagahikap Kanimo.”

<sup>174</sup> Miingon Siya, “Oo, apan Akong gibati nga adunay gahum nga migula gikan Kanako.” Kadto usa ka laing matang sa paghikap. Karon, bisan kinsa nakahibalo nga ang *gahum* maoy “kusog.” “Naluya Ako; migula Kanako ang gahum.”

Ug mitan-aw Siya libot sa nanambong hangtud Iyang hikaplagnan ang babaye, ug gisultihan siya mahitungod sa siyang talinugo. Ug iyang nabati nga ang pag-agas sa dugo sa iyang lawas miundang na. Tinuod ba kana? Ug miingon Siya, “Ang imong pagtoo maoy nagluwas kanimo.”

Karon, ang Griegong pulong diha mao ang *sozo*, nga sa tumang kahulogan “nagluwas,” sa pisikal o espirituhanon, mao ra gihapon. Siya “nagluwas.” Siya—Siya ang imong Manluluwas.

<sup>175</sup> Karon, kong Siya mao kana kagahapon, ug ang pamaagi nga Siya nanglihok, aron pamatud-an nga Siya kaniadto anaay sa taliwala sa katawhan, ang Mesiyas nga gisaad; ug mao kana ang pamaagi nga Iyang gipaila ang Iyang Kaugalingon, ug ang gisaad pinaagi sa Biblia, Iya pagabuhaton ang samang butang karon; dili ba buhaton Niya, dili ba Niya kinahanglan pagabuhaton ang samang butang?

<sup>176</sup> Moingon kamo, “Nag-ingon ba Siya mahitungod sa pag-ayo sa masakiton?” Oo!

Ang Mga Hebreohanon, ang Biblia nga bag-o ko lang gibasa, nag-ingon nga, “si Jesus Cristo karon mao ang atong Labaw’ng Sacerdote nga mobati’g kalooy kanato sa atong mga kaluyahon.” Pila ang nahibalo nga kana tinuod? [Ang kongregasyon nagaingon, “Amen.”—Ed.] Ang Biblia nag-ingon niana. “Siya ang Labaw’ng Sacerdote karon nga mobati’g kalooy



kanato sa atong mga kaluyahon.” Unya kong Siya sa gihapon ang Labaw’ng Sacerdote nga mao Siya kaniadto, unsaon Niya pagbuhat karon? Kinahanglan mobuhat Siya sa mao gihapon nga pamaagi nga Iyang gibuhat kaniadto, kong Siya sa gihapon ang maong Labaw’ng Sacerdote. Karon, tingali’g kamo . . .

Dili ako ang inyong Labaw’ng Sacerdote. Makahimo kamo sa paghikap kanako, ug kini sama ra sa inyong paghikap sa inyong bana, o sa inyong igsoon, o unsa pa, usa ka lalaki.

<sup>177</sup> Apan tugoti nga ang inyong pagtoo ang nagahikap Kaniya, ug bantayi unsay nagakahitabo. Karon, kong ako man alagad sa Dios ug nagsulti kaninyo sa Kamatuoran, ang Dios magapamatuod niana nga mao ang Kamatuoran. Ug kana magapamatuod nga si Jesus Cristo buhi niining gabhiona, nga nagatindog dinhi. Husto ba kana? [Ang kongregasyon nagaingon, “Amen.”—Ed.]

Karon, adunay inyong pagtoo, sa pikas bahin lang sa matag higayon, usa ka bahin. Kamo diha adunay pagtoo. Maayo pang magpabilin ako sa micropono dinhi, tungod kay dili nila ako madungog.

<sup>178</sup> Anaay usa nga mohangad lang sa Dios, ug moingon, “Dios, kanang tawhana wala makaila kanako. Walay iyang nasayran bahin kanako. Ako usa ka hingpit nga dili niya kaila. Apan tugoti nga ang akong pagtoo mohikap Kanimo, Ginoo. Ug nahibalo Ka kon unsay akong suliran, Ginoo. Nahibaloan Mo ang tanang bahin kanako. Nahibalo Ka kong kinsa ako, maingon sa Imong pagkasayod kang Pedro kaniadto, sama sa imong pagkasayod kang Natanael, sama sa Imong pagkasayod kon unsay suliran sa babaye nga adunay talinugo. Ug kining tawhana naga-ingon kanako nga Ikaw ‘mao sa gihapon kagahapon, karon, ug hangtud sa kahangturan.’ Tungud niini, Ginoo, tugoti nga ang akong pagtoo magahikap Kanimo.”

Ug kong buhaton Niya kana, ug sa walay pagkasayup pamatud-an ang Iyang Kaugalingon dinhi, pila kaninyo ang motoo Kaniya sa tibuk ninyong kasingkasing; kong buhaton Niya kini sa bisa’g usa, o duha, o tulo ka tawo, alang sa—alang sa usa ka pagpanghimatuod? [Ang kongregasyon nagaingon, “Amen.”—Ed.] Ang Dios magapanalangin kaninyo.

<sup>179</sup> Karon, Amahang Dios, kini hingpit na nga wala sa mga kamot sa bisan unsang tawo. Kini kinahanglan na nga mahimong supernatural nga butang. Busa ako naga-ampo nga tabangan Mo ako karon, Ginoo. Ako anaa na sa Imong mga kamot. Buhata kanako ang angay sumala sa Imong pagbuot. Sa Ngalan ni Jesus. Amen.

<sup>180</sup> Karon, ayaw’g kalisang. Sa pagpa-ubos lamang, uban sa pagtahud ingna, “Ginoo, alagaran ko Ikaw. Ug kana mahimong maoy kamatuoran, nga, kong mahikap ko ang Imong bisti, nan motubag Ka pinaagi nianang tawhana. Kana maoy

magpamatuod kanako nga kon unsa may iyang giingon mao ang Kamatuoran.” Husto kana?

<sup>181</sup> Pila ang nakakita na sa hulagway nianang Kahayag? Mikaylap na kini sa tibuok nasud, bisan diin. Nakuhaan kini sa siyensiya ug gisusi kini, ug bisan diin. Karon, Siya ania mismo karon; ang mao sa gihapong Usa nga nagsulti mahitungod sa *Kaminyoon Ug Diborsyo*, ang mao sa gihapong Usa nga didto sa ibabaw sa bukid, nga miuyog sa kabungturan kanhi, ang mao sa gihapong Usa nga mikunsad dinhi sa suba niadtong '33, ang mao sa gihapon kagahapon, karon, ug hangtud sa kahangturan. Siya mao sa gihapon.

<sup>182</sup> Karon, adunay usa ka babaye, ug karon nakamatikud siya nga may butang nahitabo. Kanang maong Kahayag nagapaibabaw kaniya. Ania siya *dinhi* nagalingkod, nagsul-ob ug berding suweter, o usa ka butang. Wala ako makaila sa babaye. Ako nagatuo nga kami dili managkaila sa usa'g usa. Tinuod kana. Nagatoo ka ba nga ang Dios. . . Ikaw—ikaw nagkinahanglan ug usa ka butang, ug nagatoo ka ba nga mahimo sa Dios ang pagpadayag kanako kong unsay imong sakit? Ug kon Iyang buhaton, nan imong masayran nga kini usa ka supernatural gayud nga gahum, tungod kay wala ko makaila kanimo. Ug kini kinahanglan nga moabut pinaagi sa usa ka supernatural.

Magaagad kini kong unsay imong hunahuna niini. Mahimong modapig ka sa mga pari, tawgon kini'g “sa yawa,” o mahimong modapig ka sa magtotoo ug tawgon kini'g “Dios.” Hain man niini ang imong ginatooan, diha kon diin magagikan ang imong ganti.

<sup>183</sup> Kong ipadayag sa Dios kanako ang imong sakit, dawaton mo ba Siya ingon nga imong—imong magtatabon sa sala alang nianang sakit? Wala ako mahibalo kong unsa kanang sakita. Apan nahibalo ako, ug nahibalo ka, nga adunay butang nga nagakahitabo.

<sup>184</sup> Karon, karon tugoti ko sa pagsulti kanimo kon unsay imong ginabati, ug dayon imong masayran; usa ka tinuod nga kainit, maanindot, mahayahay nga pagbati. Nagalantaw ako tumong Niana. Kanang maong Kahayag, nagasiga nga Kahayag nga nagapaibabaw sa babaye.

Ug ang babaye nagaantus sa sakit sa iyang tiyan. Kini usa ka matang sa hubag, susama, diha sa iyang tiyan. Dili siya taga dinhi. [Ang babaye nagaingon, “Tinuod.”—Ed.] Dili. Ikaw gikan sa halayo dili ba? Husto kana. Ikaw taga Wisconsin. Husto ba kana? Tinuod. Karon naayo ka na. Ang imong pagtoo maoy nakapaayo kanimo.

<sup>185</sup> Karon sultihi ako kong Kinsay gihikap sa babaye? Kaluhaan ug lima ka yarda ako gikan kaniya. Gihikap niya Si Jesus

Cristo, ang Labaw'ng Sacerdote. Nagatoo ba kamo niana? [Ang kongregasyon nagaingon, "Amen."—Ed.]

<sup>186</sup> Nagalantaw ako sa babaye nga akong gikahisgot. Kining babayhana, kaniya mismo nagatan-aw ako, tungod kay siya nagaampo ug ayo alang sa usa ka lalaki. Gitug-anan niya ako nga adunay iyang lalaki. . . Wala gayud siya magtug-an kanako bahin niini.

Apan ang iyang ngalan mao si Misis Waldrop. Gikan siya sa Phoenix. Nabanhaw siya gikan sa patay, ug ang iyang doktor miduaw nga nagdala ug mga x-ray ug gipakita ang kanser sa kasingkasing. Namatay siya diha sa laray sa mga alampoon. Unsa na kadugay kana, Misis Waldrop? Napulog walo na ka tuig ang milabay, ug anaa siya nagalingkod niining gabhiona, usa ka buhing saksi. Ang iyang doktor mitambong na sa tigum, dala ang. . . Miingon, "Giunsa sa pagkabuhi sa babaye?" Apan ania siya, ug wala nay timailhan pa niini.

<sup>187</sup> Adunay iyang gidala nga usa ka lalaki, ug nagaampo siya alang kaniya. Karon, himalatyon na siya, tungod sa diabetes. Karon, nga nahibalo ako. Apan ingon nga ikaw nagaampo. . . Nasayod ka nga wala ako makaila kong kinsa siya, Misis Waldrop.

<sup>188</sup> Siya taga Missouri, ug ang iyang ngalan si Mister Cooper. Husto kana. Karon, magtoo ka, makahimo ka na sa pagpauli ug mahimong maayo ka na, sir. Anaa ra kini kanimong, kong toohan mo kini.

<sup>189</sup> Aniaay usa ka babaye, ug nagaantos siya sa kahimtang nga pagkahubakon, mga kumplikasyon. Dili siya taga dinhi. Nagalingkod siya diha sa taliwala sa kadaghanan, *daha* mismo. Nanghinaut ako nga iyang nakuha. . . Dili siya taga dinhi. Siya taga Georgia. Miss McKenny. Nagatoo ka ba sa tibuok mong kasingkasing, ug nagatoo nga ang Dios moayo kanimong? Tindog diha sa imong mga tiil, kong ikaw dili kaila nako ug tinuod kana. Si Jesus Cristo nagaayo kanimong. Nagatoo ka ba?

[Nagtalikod si Igsoong Branham sa kongregasyon—Ed.]

<sup>190</sup> Sa akong likuran, anaay usa ka lalaki nga nagalingkod sa akong luyo. Siya nagapakigsulti sa Dios. Ug unsay iyang gikinahanglan; adunay iyang bata nga may sakit sa kasingkasing. Ug kanang bata adunay nagahagonghong sa iyang kasingkasing, sumala sa giingon sa doktor. Ug ang ngalan nianang tawhana mao si Mister Cox. Tindog, Mister Cox. "Ug Iyang giingnan si Sara kong unsay iyang gihunahuna, sa Iyang luyo."

[Padayon nga nakatalikod si Igsoong Branham sa kongregasyon—Ed.]

<sup>191</sup> Diha sa atbang mismo sa agianan gikan kaniya, sa likod ug diyutay, usa ka tawo nga dili taga dinhi, kondili taga New

Mexico. Wala ko gayud siya makita sukad, sa akong kinabuhi. Nagatan-aw ako diha kaniya karon, ug anaa siya sa akong luyo. Siya taga New Mexico. Ug ang maong lalaki adunay babaye nga iyang gikabalak-an gayud, ug ang batang babaye adunay sakit sa iyang baba. Kini usa ka . . . Ang lingagngag sa iyang baba maoy daot. Ug ang ngalan sa lalaki mao si Mister West. Mahimo ka bang motindog, sir. Ako dili niya kaila gayud, apan ang Ginoong Dios magaayo sa iyang anak.

<sup>192</sup> Nagatoo na ba kamo karon sa tibuok ninyong kasingkasing? [Ang kongregasyon nagaingon, “Amen.”—Ed.] Pila kaninyo ang nagatoo na karon sa tibuok ninyong kasingkasing? [“Amen.”] Karon, dili ba si Jesus Cristo mao sa gihapon kagahapon, karon, ug hangtud sa kahangturan? [Amen.”] Ginadawat na ba ninyo Siya ingon nga inyong Manluluwas? Iisa ang inyong kamot. (“Amen.”) Nagatoo na ba kamo Kaniya ingon nga inyong Mananambal? (“Amen.”)

<sup>193</sup> Ania, aniaay usa ka personang nagalingkod dinhi, bakol o ingon niana, nagahigda sa usa ka teheras.

Madungog mo ba ako pinaagi niining micropono? [Ginakuha ni Igsoong Branham ang micropono ug nagalakaw padulong sa kilid sa intablado ug nagapakigsulti sa babayeng diha sa teheras—Ed.] Wala ako makaila kanimo. Ikaw usa ka babaye nga naghigda lamang diha. Kong mahimo ko ang pag-ayo kanimo, buhaton ko kini. Dili ko mahimo ang pag-ayo kanimo.

[Usa ka lalaki nagasugod paghilak—Ed.] Maayo. Usa kini ka lalaki nga nagakalipay. Ang iyang anak naayo na.

Wala ako makaila kanimo. Ikaw usa ka babaye, ug ako lalaki. Kini maoy unang higayon sa kinabuhi nga nagkahibalag ta, sa akong pagtoo. Kining mga tawo . . . ? . . . nga nagdala kanimo. Sa tinud-anay, kini maoy unang higayon nimo dinhi; gidala ka lang dinhi. Gikan ka sa halayo kaayo. Nalandongan ka na ngadto sa kamatayon. Ikaw adunay kanser. Dili kini bakol. Usa kini ka kanser. Ang doktor wala nay mahimo kanimo. Tinuod kini. Ug sigurado na gayud nga ikaw mamatay; kadtong mga doktor wala nay mahimo kanimo.

<sup>194</sup> Usa niana ka higayon adunay tulo ka mga sanlahon nga nagalingkod sa ganghaan sa Samaria. Ug silang mga sanlahon miingon, “Nganong magalingkod ta dinhi hangtud nga mangamatay ta?” Tungod, sa tanang sakit, mga nanghimalatyon na sa gutom, ug didto nagapangkaon na sa usa’g usa nilang mga anak. Sila miingon, “Kong mangadto ta sa kampo sa mga kaaway, ang mga Sirianhon; kong ila tang pamatyon, kita mangamatay gihapon, bisan unsaon. Apan kong luwason ta nila, mangabuhi pa ta.” Ug ilang gipahimuslan kadto nga higayon. Ug, pinaagi niadtong pagtoo, dili lamang nila naluwas ang ilang kaugalingon kondili ang tibuok katawhan.


<sup>195</sup> Karon, mamatay ka kong maghigda ka diha. Apan wala ka gihangyo sa pag-adto sa kampo nga ilang gibuhay. Apan gidapit ka ngadto sa balay sa Amahan, . . . ? . . .

<sup>196</sup> Himalatyon ka na tungod sa kanser. Dili ka mabuhi kong walay Dios. Dili ka taga dinhi ning maong siyudad. Dili ka taga dinhi. Ikaw nagagikan pa sa halayo kaayo. Ikaw taga Milwaukee. Tinuod kana. Husto kana. Akong nakita ang siyudad. Nasayod ako niini. Husto kana.

Nagatoo ka ba? Dawaton mo ba karon ang Dios ingon nga imong Mananambal? Kong buhaton mo, bisan pa kong unsa ka pa kaluya, unsa ka man ka masakiton, nagatoo ako, sa imong kahimtang, magatindog ako sa Ngalan ni Jesus Cristo. Ug dalhon kanang teheras ug mopauli, ug manginabuhi alang sa kahimayaan sa Dios. Sundon mo ba ako, ingon nga propeta sa Dios? Nan bangon ug lakaw. Mamaayo ka na. Mamaayo ka! Ayaw'g kalisang. Tindog gikan sa teheras; Ang Dios magayo kanimong. Kita mo?

<sup>197</sup> Adunay usa nga mogunit kaniya aron makatindog siya ug makabaton ug kusog. Nagatoo ka ba sa Dios? Pasagdi lang siya nga makabaton ug diyutay'ng kusog; mamaayo na siya. Ingon niana, igsoon. Anaa na siya, sa Ngalan ni Ginoong Jesus! [Ang kongregasyon nagakalipay samtang ang igsoon babaye nagatindog na karon.—Ed.]

Manindog ta ug ihatag ang pagdayeg ngadto sa Dios. Siya mao sa gihapon kagahapon, karon, ug hangtud sa kahangturan! [Ang kongregasyon nagakalipay ug ayo ug nagadayeg sa Dios —Ed.]

Lakaw, ug ang Ginoong Jesus Cristo magapanalangan kanimong. [Ang kongregasyon nagapadayon sa hilabihang kalipay ug nagadayeg sa Dios—Ed.] 

*KINSA KINING SI MELQUISEDEC?* CEB65-0221E  
(Who Is This Melchisedec?)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Pebrero 21, 1965, sa Parkview Junior High School sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2009 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)